

افتكاسات زوج محظور

حلقات كوميديا " إلهام و ممدوح "

الطبعة الأولى
2020م- 1442هـ

ديوان العرب
للنشر و التوزيع



ملحوظة: حقوق الطبع جميعها محفوظة للمؤلف

عنوان الكتاب: افتكاسات زوج محظور

اسم المؤلف: إيمان العادلي

التصنيف الأدبي: حلقات كوميديا

رقم الإيداع: 2020 / 17326

الترقيم الدولي: 4 - 55 - 6830 - 977 - 978

تصميم الغلاف: محمد وجيه

التدقيق اللغوي: د. هبة ماردين

التنسيق الداخلي: محمد وجيه

رقم الطبعة: الطبعة الأولى

المدير العام: د. فادية محمد هندومة

دار ديوان العرب للنشر والتوزيع - مصر - بورسعيد

جوال: 00201211132879

البريد الإلكتروني: mohamedhamdy217217@gmail.com

حقوق الطبع والنشر لهذا المصنف محفوظة للمؤلف، ولا يجوز بأي صورة إعادة النشر الكلي أو الجزئي، أو نسخه أو تصويره أو ترجمته أو الاقتباس منه، أو تحويله رقمياً وإتاحته عبر شبكة الإنترنت، إلا بإذن كتابي مسبق من المؤلف أو الناشر.





افتكاسات زوج معظور

حلقات كوميديا

إيمان العادلي





إهداء

إلى كل زوج حاول إظهار إبداعاته
أثناء الحجر الصحي بسبب كورونا...
إلى كل زوجة تحملت فوق طاقتها
تصرفات لم تكن موجودة قبل الحجر.
إلى كل من يحب اليوميات الكوميديّة.

مقدمة

مدوح زوج مصري أصيل زي أي زوج، بس الحظر عمل عمايله معاه
وغير شوية من صفاته
خلاه زهقان وطهقان، وبالتالي فكر يعمل ايه يسلي بيه صيامه والحظر،
كمان فقرر يدخل المطبخ ويعملنا افتكاسات وحوارات.

إلهام بقى يا عيني عليها، زوجة مصرية عسولة، ومتحملة جوزها وعمايله.
ما هو محظور يا حبة عيني، والست الشاطرة تتحمل جوزها في حظره
وصيامه.

أما بقى رهف وخالد فهما بونبونة البيت، وبرضو البنزين اللي بيولعوا بينهم.

عموماً هسيبكم كل يوم تتابعوا عمايلهم

الحلقة الأولى

- إلهام: صباح الخير يا حبيبي اصحى بقى العصر قرب يأذن هو ده الصيام
برضو.

ده أنا بصحى كل يوم من الصبح بدري ولا فارق معايا صيام ولا غيره
ياعيني علينا بقى الستات في الصيام والله لنا الجنة يا روحي
ممدوح يا حبيبي اصحى وفوق بقى عاوزين طلبات للبيت علشان أجهز
الأكل الساعة 2 الظهر أهو ولسه مش عارفة هعمل إيه أكل
- ممدوح: اعلمي اي حاجة موجودة في التلاجة، مكسل أنزل والله حاسس
إني مرهق.

- إلهام: يوووه... أنت كده علطول يا حبيبي كسلان، علطول في الصيام
بص هات لنا فراخ علشان الولاد مبيحبوش اللحمه.
- ممدوح: يوووه... عليكي أنتي ما ياكلوا اي حاجة من الموجود
دلحك ده هيتلف الولاد.

- إلهام: حرام عليك يا ممدوح دول صايمين طول اليوم.
- ممدوح: ما هما نايمين يعني شايفهم طول اليوم بيتعبوا.
- إلهام: ماشي يا حبيبي أنت كده علطول، خلاص هعمل كباب حلة
ومكرونة.

- ممدوح: مكرونة ايه محدش بياكلها في الصيام وبتتري، ولا هو أكل
وخلص.

- إلهام: طيب ماشي بلاش مكرونة، هعمل الأكل وبعدين أعمل صينية
كنافة تستاهل بَقك يا حبيبي.

- ممدوح: لا... لا... متعملش سيبها أنا هعملها.

بكرة بقى نعرف ممدوح وإلهام والحلقة الثانية عملوا ايه.

الحلقة الثانية

- إلهام: حبيبي يلا بقى قوم إلحق صلي العصر، المغرب هياذن خلاص، وأنا خلصت الأكل وعملت أحلى كباب حلة هتاكوا صوابكم وراه.
- ممدوح: هقوم أهو أتوضأ وألحق أصلي العصر، بقولك إيه متعمليش السلطة هعملها أنا وأظبطها.
- إلهام: ماشي يا حبيبي هسيبهالك.
- (بصراحة دخلة الرجالة المطبخ بتهدله، هلاقي البقدونس وقشر- البصل في كل حته يا سلام لو يسبني أعمل أنا السلطة).
- ممدوح: حبيبتى أنتي بتكلميني؟
- إلهام: لا لا يا حبيبي ده أنا بكلم نفسي في المطبخ بسليني هههههه.
- ممدوح: شفتي السلطة بتاعتي، ولا سلطة الشيف الشرييني.
- إلهام: آه.. آه يا حبيبي ربنا ما مجرمنا منك ولا من سلطاتك.
- (يا لهوي أرضية المطبخ كلها بقدونس وقشر- بصل وطماطم، أهو ده اللي خدته من عمائك للسلطة)
- ممدوح: بتقولي حاجة يا إلهام
- إلهام: لا لا... مبقولش

يلا يا ولاد الأذان هياذن حد منكم يجي يساعدي ويحط الرز في الأطباق
ويوزع السلطة الي عملها بابا.

- الأذان أذن يلا تعالوا

- حلو أوي كباب الحلة يا ماما تسلم إيديكي

- إهام: تسلموا يا حبايبي

- ممدوح: والسلطة مفيش تسلم إيديك يا بابا

- الولاد: تسلم الأيدي يا بابا سلطة تجنن بصراحة

- ممدوح: استنوا بقى أفطر وأوريكم عمائل الشيف شربيبي

- إهام: (آه ياني من افتكاسات جوزي وعمايله)

- ممدوح: بتقولي حاجة يا حبيبي

- إهام: لا يا حبيبي ده أنا بكلم نفسي من حلاوة السلطة

استنونا بكرة ونعرف ممدوح هيفتكس ايه تاني في المطبخ

الحلقة الثالثة

- إلهام: حلو الأكل النهاردة يا ولاد
ايه رأيك يا حبيبي عملته زي ما بتحبه بالظبط علشان متقولش إن حماتي
بتعمله أحلى مني.
- الولاد: تسلم إيديك يا ماما الأكل يجنن فعلاً.
- ممدوح: تسلمي يا ست الكل بس برضو أكل الحاجة أحلى هههههه
- إلهام: طبعاً يا حبيبي
- ممدوح: أنا هاعمل لكم حاجة حلوة أوي، ومفاجأة هاتكلوا صوابكم
وراها.
- إلهام: طبعاً يا حبيبي أنت هتقولي مانا مجرباك بس ايه هي الأول علشان
قلبي الصغير لا يتحمل
- خالد: يا ماما اصبري مش بابا قال مفاجأة أكيد زي كل مرة
وبصوت واطي (سلة الزبالة موجودة)
- رهف: ضحكت بصوت عالي وبسرعة غمزت لها مامتها بعنيها مامتها في
إشارة إن باباها يزعل ويخلى الليلة سودة
- ممدوح: أنا شايف حركات وهمسات وضحك منكم ولا بيتهيألي
- إلهام: أبداً يا حبيبي احنا بنقول إيه هي المفاجأة ومستنين
ودخل المطبخ وزى العادة تخبيط وتكسير ومش عارفين بيعمل ايه

وفجأة.....

ممدوح: بعد نصف ساعة طلع ومعاها طبق فيه كنافه شكلها روعة

-ممدوح: حد يقدر يعمل الحلاوة دي يا رهف

ايه رأيك يا خالد؟ شايفين الحلاوة والجمال مش ماما الي مش عارفة تعمل

حاجة وعمال تجري في البيت شمال ويمين زي خيل الحكومة

-إلهام: حلو أوي يا حبيبي والله شكلها روعة تسلم إيديك ندوق بقى

ونشوف الجمال، وهي بتعض على شفايفها من الغيظ ودخلت أخذت شاور

تنزل بيهم الضغط الي جالها وهي بتكلم نفسها كالعادة (ربنا يستر وتطلع

حلوة)

-رهف بصوت عالي: يا ماما ايه دااا مش معقولة كل يوم افتكاسة تعبنا يا

ماما ياما

-إلهام: خير في ايه أبوكم ولع فينا ولا في ايه

-خالد: يا ماما يا حبيبتى مش قولتلك الراجل دا ما يدخلش المطبخ تاني

خلاص كفاية افتكاسات

-رهف: ماليش دعوة مش عارفة أكل حاجة حلوة في البيت ده

-إلهام: طيب في إيه الكنافه حلوة وشكلها حلو أوي

-رهف: طيب شو في كده يا ماما

هاقي الشوكة والسكينة كانت المفاجأة

استنونا بكرة مع إلهام وافتكاسات ممدوح ونشوف ايه المفاجأة

الحلقة الرابعة

- رهف: ماما يا ماما شوفي الكنافة دي مش عارفة أطلعها من الصينية
- إلهام: مالها يا حبيبتي في ايه
- خالد: ماما الحقني الكنافة يا ماما
- إلهام: ايه الحرب قامت ولا ايه مالها الكنافة
- رهف وخالد: تعالي بنفسك يا ستي وشوفي
- إلهام: ايه ده يا لهووي دي ايه دي
يا ممدووووح يا ممدووووح
حرام عليك دي حجر صوان مش كنافة يا خسارة الكنافة والسمن البلدي
والسكر، أنت عارف السمن بكام ولا السكر بكام؟! حرام عليك
ولا الكنافة بكام ده الكيلو ب20 ج
كل يوم تدخل المطبخ وتفتكس في حاجة وتبوظها لنا
حرام عليك يا حبيبي
كفاية عليك السلطة والرز
- ممدوح: في ايه هي جريمة ولا جريمة يعني ما أجدع الشيفات بيغلطوا
برضوايه يعني!! وبعدين أنا دخلت على النت وعرفت الغلطة فين
وهصلحها لكم

- هي ساعة كمان واتفرجوا على أجدع صينية كنافة فيكي يا مصر
- إلهام: لا كفاية كده وحرام بصراحة، بص يا حبيبي أنت تدخل الأوضة وتستريح شوية، ولا أقولك شوف كام مسلسل كده وأنا هظبطها لك وأخليها أجدع صينية كنافة
- ممدوح: لأ يا هانم علشان تنسبها لنفسك إنك أنتي الي عملتها
- محدث مصلحها غيري
- يلا وسعي كده وفضولي المطبخ
- رهنف وخالد: ربنا يعوض علينا
- إلهام: آه ياني من جوزي وافتكساته آه يا ضغطي ياني
- (نفسى أرميها في أقرب باسكت زباله ونستريح كلنا)
- ممدوح: بتقولي حاجة يا حبيبي
- إلهام: لا يا حبيبي بكلم نفسي كالعادة
- ممدوح: أنا داخل أظبطها واستنوني بقى سلام
- بكرة بقى نشوف ممدوح وافتكساته وإلهام والي جرى لها

الحلقة الخامسة

- ممدوح: يعني أنا كل يوم أزعم المطبخ ده مش بينظف ليه الأطباق
والصحن كلها مش نظيفة
- إلهام: ايه بس يا حبيبي مالك صاحي بدري النهاردة ليه ده الساعة
ماجتش 10 لسه مش عوايدك يعني
- ممدوح: أنا بقولك المطبخ تقولي صاحي ليه
- إلهام: أنت عاوز تعمل مشكلة وخلص يا حبيبي ولا ده بسبب
الكنافة بتاعتك اللي فشلت يا روجي ومنفعش لها عملية الإنعاش اللي
عملتها لها هههههه
- أنت بتنسي ولا ايه لما بتعمل حاجة في المطبخ بتقبلوا من فوقه لحتته
وبيبقى عامل زي بيت الأشباح وتسيب الأطباق وبيبقى عاوز يتنسف هههه
- ممدوح: أنا برضو السبب؟! أنتي دائماً مش بيعجبك أي حاجة بعملها
- إلهام: إزاي يا روح الروح هي بس الكنافة بتاعة امبارح هي اللي غلطانة
إلا بالحق يا حبيبي هو أنت حطيت إيه علشان تبقى حجر كده هههههه
- ممدوح: أقولك أنا ماشي من وشك ومش داخل المطبخ تاني ومنتحايليش
عليأ أعمل سلطة ولا حتى رز

- إلهام: عادي زي كل يوم يغضب زي الأطفال ويخرب الدنيا
- رهف: إيه يا ماما مش قولتك كبري دماغك وبلاش خناقات
- إلهام: إسألني أبوكي شوفي أنا كام ألف مرة أطنش وهو يغلط ويطلع أرفه
عليا هو يعني وحده اللي صايم
- خالد: خلاص يا ماما بعد كده سيبه يعمل ويفتكس اللي هو عاوزه
واحنا الضحايا وأمرنا لله
(أهو أحسن من النكد برضو)
- ممدوح: يا ست هانم هانفطرايه النهاردة ولا هتفضلي اليوم كله في موقعة
الكنافة
- إلهام: اتفرجوا والله هاسبيلكم البيت واطفش علشان كده كتيرر عليا
ضغطي علي عليا
اية يا حبيبي عايزايه بس
- ممدوح: هانفطرايه يا هانم
- إلهام: أي حاجة موجودة وخلاص
- ما أنت منزلتش تجيب لنا حاجة من الخناق طول النهار
- ممدوح: مش قولتك اتصلي بالدليفيري يجيب لحمة وخضار
- إلهام: المصروف خلص من يومين أعمل إيه

- ممدوح: ده لسه ماعدش من الشهر إلا 18 يوم أروح فين أنا مش
مديكي مصروف الشهر
- إلهام: أنت يا روجي هاتجني مش كل يوم تحرق لنا حاجة ونرميها في
السلة

أستنونا بكرة مع إلهام وافتكاسات ممدوح ونشوف آخرة الصيام معاه

الحلقة السادسة

- ممدوح: ها يا هانم هتفطرينا ايه النهاردة
- إلهام: ايه رأيك يا حبيبي عندنا بواقي فراخ أظبطها لكم وأعملها شاورما ولا أفرمها بحبة بصل وبقدونس وأعملكم أحلى كفتة فراخ
- ممدوح: بواقي يا هانم ايه اللي بتتكلمي عنها دي
- ده يدوب صدر ودبوس اللي فاضلين هيعملوا إيه دول وأحنا 4 أفراد
- إلهام: أعمل ايه كلف يا سيدي اطبخي يا جارية
- بص يا حبيبي أدخل نام وهدى أعصابك وحتلاقي فطار 5 نجوم
- (يارب صبرني ومنفجرش في الراجل ده قال على رأي المثل أقرع ونزهي)
- ممدوح: بتقولي حاجة يا إلهام
- إلهام: لا لا يا حبيبي بكلم نفسي بس
- حبيبي لو مش جايلك نوم قوم ساعدني واغسل معايا الكام طبق دول
- ممدوح: شفتي بقى أهو أنتي الي بتجرجريني للمطبخ أهو وبعد كده تزعلي
- إلهام: خلاص يا حبيبي حقا عليا تعالى بقى ساعدني شوية
- ممدوح: لأ أنا هنزل أجيب لكم طلبات وأقابل واحد صاحبي على ما تجهزي الفطار
- إلهام: (أحسن برضو)

- ممدوح: بتقولي حاجة يا حبيبي
- إلهام: لأ مبقولش مبقولش
ممدوح نزل وإلهام دخلت المطبخ عملت أجمل كفتة من بواقي الفراخ
ومعاهم رز مفلفل وطبق سلطة 5 نجوم
وفجأة ممدوح رجع وجايب الطلبات ومخبي كيس وراه
- إلهام: إيه يا حبيبي اللي ورا ظهرك ده
- ممدوح: ده كيس بسبوسة جاهز جيبته هعمله
أهو جاهزة الطريقة عليه ولا افتاكسات ولا غيره
أصلي وأنا نازل عارفة جارتنا أنغام
- إلهام: أيوه ماها جارتنا أنغام بقي؟ أتقابلتوا في الركن البعيد الهادي
- ممدوح: أنتي كده طول عمرك نيتك السيئة سبقاكي
أنا قصدي يا حبيبي وأنا نازل على السلم شमित ريحة البسوسة من شقتها
وقلت أعمل لكم زيها وأوريكم عمايل الشيف حسن
- إلهام: يا لهووي يا أنا من عمايلك
وافتاكسات جوزي
استنونا بكرة ونشوف ممدوح عمل ايه مع البسوسة وافتكس فيها ولا لأ.

الحلقة السابعة

- ممدوح: إلهام فين صواني البسوسة؟ مش لاقبها علشان نويت خلاص أدوقكم أجمل بسبوسة
- إلهام: عندك يا حبيبي في الرف الي فوق (ربنا يستر يارب وتطلع حلوة)
- ممدوح: بتقولي حاجة يا حبيبي
- إلهام: لأ يا قلبي ده أنا بكلم نفسي بس
- خالد: ماما يا ماما
- إلهام: نعم أيوة طول اليوم ماما ماما في ايه
- خالد: النت خلص يا ماما مش بيفتح الفيس
- إلهام: خلص ايه ده الي خلص ده أبوك لسه دفعة من 15 يوم هو أنت وأختك بتشربوه
- خالد: بنشوف المسلسلات يا مامتي من غير إعلانات بنشوفها على النت أنا ورهف ووطي صوتك ل بابا يسمعنا ويخلي يومنا مش فايت
- إلهام: يا لهووي يا أنا منكم ومن باباكم وافتكاساته
- رهف: الله يا ماما ريحة بسبوسة تجنن في الشقة
- صوتكم عالي ليه يا حبيبي وايه الريحة الجميلة دي
- إلهام: باباكي بيفتكس بسبوسة في المطبخ ادعور ربنا تطلع حلوة

الحلقة الثامنة

- إلهام: في ايه يا رهف مالك؟
- رهف: تعالي هنا المطبخ يا ماما علشان تشوفي الحلاوة معايا
- إلهام: جاية أهو آه ياني مش عارفة أرتاح شوية بعد الفطار زي الناس
- خالد: ماما يا ماما ادفعلنا النت بقى ووالله آخر مرة نشربه
- خلاص يا حبيبتي رمضان هيخلص ومش هنشوف مسلسلات والنبي يا ماما وحياتي عندك
- إلهام: استنى أشوف موضوع النت ده بعد ما أدخل المطبخ وأشوف رهف ماها
- إلهام دخلت المطبخ ووراها خالد وعيونه كلها انتظار وتوقع لافتكاسة جديدة من باباه وكله أمل يطلع توقعه غلط وياكل أجمل بسبوسة
- رهف: اتفضلي يا ماما طلعي لي حته من الصينية دي عامله زي الطوب وعليها حته إزاز بتبرق
- شوفي افتكاسات بابا أحنا تعبنا يا ستي
- إلهام: وريني كده يا لهوووووي إيه ده دي ناشفة حجر وإيه الأزاز اللي بيبرق عليها ده
- عوضنا على الله في البسبوسة والسكر والسمن

-إلهام: الشركة هي اللي مش مضبوطة برضو ولا أنت افتكست من الآخر
اعترف يا حبيبي وقول علشان المرة الجاية تطلع حلوة يا حبي
-خالد ورهف: هو في مرة جاية يا عيني علينا في البيت ده
-إلهام: بس ياواد أنت وهي خلوا أبوكم يعترف
يلا يا حبيبي اعترف

-ممدوح: مفيش يا حبيبتى أنا عملت شربات تقيل وحلو كده زي **cbc**
سفرة وضفت عليه ليمونة بجالها بس كده يا قلبي
-إلهام: محدش يحوشي سبوني عليه يا لهوووي ياني
بتفتكس ليه وتحط ليمون على شربات البسبوسة
-ممدوح: حبيت أضيف التاتش بتاعي
-إلهام: ياهوووووي يا ضغطي ياني
بكرة بقى نكمل ونشوف ممدوح هيفتكس ايه تاني وإلهام هتعمل معاه ايه

الحلقة التاسعة

-إلهام: حبيبي يا نور عيني أبقى أسأل واستشيرني يا روجي قبل ما تفتكس
وتحط ليمون لشربات البسبوسة

-ممدوح: هو الليمون زاد حبتين يا حبيبي، لكن والله كان شربات يجنن
المرّة الجاية هحط نقطتين بس علشان يطلع سيرب تخين كده زي الشيف
حسن

-إلهام: وهو في مرات تانية يا روجي (آه يا مرارتي ياني من جوزي وعمايله)
التليفون بيرن

-رهف: مامااا خالتو على الفون تعالي كلميها

-إلهام: خلاص يا حبيبي أكلم أختي وأرجعلك نشوف البسبوسة دي
أهلاً يا سامية وحشتيني فينك يا بنتي وحدوتة بقى وكلام ستات وسامية
بتشتكي لها من جوزها وأنه مش بيساعدها ولا بيغسل حتى كوبية ميه
وأنها بتحسدها على جوزها ممدوح وأنه بيدخل المطبخ وبيساعدها فيه
وإلهام تضحك وتقولها آه جوزي مفيش في افتكاساته اتنين يا حبيبي كانت
مصر خربت ههههه

سامية أختها نبتها لكحك العيد والبسكوت الي هيعملوه

لأن بره غالي وعلشان ظروف الحظر وكمان ينزلوا قبل الحظر يجيبوا لبس
العيد للولاد

-إلهام: آه يا سامية فكرتيني ده الوقت خلاص بيجري ومفيش وقت

أما أقول لمدوح حبيبي بقى علشان يستعد

يلا سلام يا حبيبي ونتفق ننزل قبل الحظر

-إلهام: ممدوح يا حبيبي فينك يا قلبي ممدوح

-رهف: (بصوت واطي) بابا في المطبخ من وقت ما بتكلمي خالتو يا ماما

- إلهام: ممدوووح بتعمل ايه عندك يا لهووي ياني

- ممدوح: مفيش يا حبيبي بعملكم سلطة جديدة بالفاصوليا والفلفل

تجنن جبت طريقته من النت بس مش لاقى مايونيز ففكرت في بديل بس

هعملكم مفاجأة أصبري

-إلهام: طيب أنا خلصت البامية وسبكتها تمام من بدري وقبل الفطار

هعمل حبة رز

وعاوزاك يا حبيبي نتكلم كده في شوية حاجات

-ممدوح: ماشي يا حبيبي أخلص السلطة ونتكلم

على فكرة يا حبيبي أنا لاقيت البامية ناقصة فيه وزودتها لك فيه

-إلهام: فتحت الحلة ولاقيت البامية اللي سبكتها وسوتها باللحمة بتعوم في

المية

يا لهوووووي يا أناا من افتكاسات جوزي

آه يا ضغطي الي عليا
البامية باظت يا ممدوح من افتكاساتك
أسبكها تاني أزاي
أعمل ايه ياني
-ممدوح: متعمليش يا حبيبتى أنا هظبطها وأرجعها زي الأول بعد ما أعمل
السلطة
-إلهام: لأ سيب البامية في حالها وأنا هظبطها وأمرى لله
تفتكروا إلهام هتعرف تظبطها
وممدوح هيفتكس إيه تاني في السلطة
بكره هنعرف آخر عمايله

مدوح فصل البامية واللحمة في طبق وكمل تسوية الدمعة الي كانت عامت
وهدي النار وسابها تتسبك وبدأ يعمل السلطة
سلق الخضار وظيفه وحطه في الطبق ونسيبه يكمل سلطته ونشوف إلهام
والولاد صوتهم عالي ليه

-إلهام: رهف تعالي ساعديني وأنشري الغسيل على ما أشوف الي ورايا

-رهف: يوووه يا ماما خليه بعد الفطار تعبانة والله مش قادرة أقوم

-إلهام: طبعاً تعبانة من كتر النوم أنتي وأخوكي بتاع المسلسلات

خالد قوم يلا ساعديني وجهاز السفره معايا

-خالد: طيب يا ماما هقوم أهو، تعبان وجسمي مكسر

ماما قلتي لبابا عاوزين لبس العيد، كل أصحابنا اشتروه وأحنا لأ

-إلهام: طيب قوم يا فالح الأول وبعدين ندخل معاركنا مع أبوك لما يخرج

من المطبخ ونشوف آخر افتاكاسته

-رهف: بصوا بقى مهما يفتكس النهاردة تقوله الله وجميل وتسلم إيديك

الحلوة دي علشان يوافق نجيب لبس العيد

شغلوا الجي وظيفوا الدي يا ماما

-إلهام: جي ايه ودي ايه يا واد أنت وهي

انت خلاص بوظ دماغكم

بس فكرة برضو إننا نشجعه لغاية ما يوافق على طلباتنا وكحك العيد

والبسكوت كمان

يلا بقى جهزوا السفارة على ما أدخل المطبخ أشوف أبوكم اتأخر ليه
مدوح يا حبيبي ايه الأخبار
-مدوح: يلا حبيبي ظبطت البامية أهو تجنن واتسبكت وصلحت غلطي
وأدي الرز مفلفل أهو ويجنن
ودي بقى السلطة واووووو تجنن
-رهف وخالد: هيببييه المغرب أذن ندوق بقى
البامية جميلة تسلم الأيادي
-إلهام: بصراحة حلوة عرفت تظبطها يا حبيبي ههههه الحمد لله
-خالد: أدوق السلطة بقى بموت فيها يا بابا
بس هي لونها غامق ليه
-مدوح: مش مهم اللون يا ابني المهم الصنعة والطعم
دوقوا بقى وقولولي ايه رأيكم
-إلهام ورهف وخالد: ايه ده يععع
تاني يا بابا افتكاسات تاني
بكرة نعرف ممدوح افتكس تاني في السلطة أزاي

-ممدوح: هههههه مصرين برضو
هفولكم سر وصفاتي الممدوحية
بصوا بقى سر الطعم الغريب الجميل ده أنا فكرت وقدحت زناد الموهبة
عندي وحطيت مستردة مع حبة كاتشب بدل المايونيز
عملت صوص خاص بيا هههههه
أيه رأيكم

-إلهام: مستردة يا ممدوح مع كاتشب يا لهوووي
حرام عليك
مستردة على خضار مسلوقة في السلطة أزي يا حبيبي
-ممدوح: هي دي الشطارة والعبقرية ايه رأيكم ههههه
-إلهام ورهف وخالد: آه آه حلو يا بابا بس متكررهاش تاني
خلي اختراعاتك حصرية يا حبيبي مرة واحدة بس (لحسن كده هنموت
بصراحة)

-إلهام: آه أنا من رأي الولاد برضو
الوصفة تتعمل مرة واحدة حصري وكده فلة شمعة منورة
بقولك يا حبيبي عاوزة أتكلم معاك
واحنا بنحبس كده بكويتين الشاي اللي يظبطوا الدماغ دول
-ممدوح: خير يا روحي قولي
أنا مبسوط أوي النهاردة علشان الوصفة عجبتكم

- إلهام: ربنا يبسطك علطول يا حبيبي
- رهف وخالد: (خشي عليه يا ماما بالتقيل علطول قبل ما يصحح لنا)
ماشي يا بابا ماشية معاك يا مشهيننا وصفات يا قمر
- إلهام: يلا يا واد أنت وهي على أوضتكم وسبوني أقول الكلمتين
- ممدوح: ايه يا حبيبي داخله مجلس الأمن ولا إيه ما تقولي عاوزة ايه
- إلهام: بص يا حبيبي العيد بعد 4 أيام
- عاوزين نجيب لبس العيد والكحك والبسكوت
- ممدوح: لبس إيه وبسكوت إيه يا هانم
- إيه مفيش أي تفكير خالص، مفيش كورونا، مفيش إحساس بالمسؤولية
- إلهام: يعني ايه يا ممدوح
- سامية أختي أحسن مني ولا أختك اعتدال ولادها أحسن من ولادي
- علشان يجيبوا لبس العيد واحنا لأ، ولا الكحك والبسكوت كمان
- مفيش عيد من غيرهم
- ممدوح: يبقى مفيش
- بكرة هنشوف ممدوح وإلهام هيكملوا خناقهم ولا ممدوح هيسمع كلامهم
- انتظرونا بكرة

الحلقة الثانية عشر

نستكمل بقى حوار العيد والكحك والبسكوت
 إلهام: يعني ايه مفيش بسكوت ولا كحك ولا لبس عيد للولاد يا ممدوح
 -ممدوح: هو كده زي ما قولتلك وسمعتي بودانك
 قال لبس العيد قال في أم الكورونا دي، هو ايه مفيش عندك تفكير ولا
 إحساس!!

-إلهام: يعني ايه وماله الإحساس يا سي ممدوح ومال لبس العيد للعيال
 والبسكوت والكحك
 كل الناس اشترت الكحك وأولهم أختك اعتدال هي وعيالها وأختي سامية
 كمان

يعني أنا وعيالي اللي هنتحرم من اللبس والكحك في وسط العيلة
 أهى أهى أهى يا فرحتهم فيا
 -ممدوح: فرحة ايه اللي فيكي دي
 كبري دماغك كده واعقلي يا إلهام وخلي عندك وعي وخافي على العيال وعلى
 نفسك

لبس إيه اللي هتنزلي تشتريه ده
 أنا يستحيل أوافق على كده أبداً وعيطي واعملي ما بدالك

أنا قلت مفيش لبس عيد ولا نزول
سامعة الكلام
وأوعي من وشي كده خليني أقوم أضربلي فنجان قهوة بدل الوش الي
جبتھولي في دماغي ده
(ستات فاضية والله ودماعهم تعبانة قال أختها وأختي وكلام فاضي توب
عليا يارب من هبل الستات ده)
-إلهام: كده يا ممدوح بتسبني وتقوم واحنا مرسناش على بر والعيد خلاص
قدامه يومين
أهئ أهئ أهئ
أنا مش قعدالك في البيت ورايحة عند ماما ولما تشوف حل وتعرف قيمتي
وتقدر أبسط حقوقي أنا والولاد هبقى أرجع
-ممدوح: يوووه أدي الي أنتي فالحة فيه كل خناقة أروح لماما وتعرف قيمتي
أقولك روعي يا إلهام وبرضو مفيش لبس العيد ها
-خالد ورهف: يوووه ماما بابا
استوب بقي وكفاية خناقات ممكن تسمعونا شوية وتعرفوا رأينا في الموضوع
ده لو سمحتوا خمسة هدوء واسمعونا
-ممدوح: ماشي يا سي خالد أنت وست رهف
ما هي هزلت بس يلا يمكن الحل يجي منكم
-إلهام: ماشي هسمعكم عاوزين إيه بس والله لحمشي برضو وأروح لماما

-خالد: يا ماما يا حبيبتي لو معجبكيش كلامنا أمشي عند تيتا
إيه رأيك يا حبيبتي اتفقنا
-إلهام: ماشي اتفقنا لما أشوف آخرتكم أنتم وأبوكم
بكرة بقى هنعرف خالد ورهف هيعملوا إيه وأزاي هيجلوا مشكلة إلهام
وممدوح

استنونا....

الحلقة الثالثة عشر

رهف وخالد عندهم فكرة يفضوا بيها الأشتباك بين إلهام وممدوح

بس يا ترى هتتعجب إلهام وممدوح هيوافق

ده اللي هنعرفه

-ممدوح : ها ياسي خالد أنت وست رهف ايه أفكاركم النيرة اللي هتتحفوني

بيها

-رهف وخالد: بلاش تريقة يا بابا لو سمحت قبل ما تسمعنا

-إلهام: أتفضلوا قولوا وكده كده أنا رايحة ل ماما وأبقوا عيدوا مع أبوكم

لوحدكم .. ها

-رهف وخالد: يوووة أصبري يا ماما كده وصلوا بينا على النبي

-إلهام وممدوح: اللهم صلي وسلم على نبينا أفضل الصلاة والسلام

-رهف وخالد: بصوا بقى حبايب قلبنا بابا وماما

أحنا مش عيال ودماغنا كبيرة وعمليين

-ممدوح: نعم يا خويا أنت وهي.. عمليين

عمليين أزاي يعني

-خالد: يوووه يا بابا أصبر علينا وسبني أعرض الفكرة عليكم بس بالله

عليك متتريقش علينا

شوفوا أحنا مش عاوزين لبس العيد

-إلهام: نعم يا واد أنت وهي.. بقى أنا بكافح معاه وبتخانق علشانكم
وحسيب البيت علشان يجيب لكم اللبس وأنت تقول مش عاوزين لبس
العيد

أنا مش هسمع الكلام الفاضي ده

شكلك متفق مع أبوك أنت ومقصوفة الرقبة رهف

-خالد: يا ماما أسمعي الفكرة الأول وبعدين أتكلمي يا حبيبتى لو
سمحتي

-ممدوح: في ايه يا إلهام ما تسمعي العيال عاوزين يقولوا ايه ولا أنتي كده
دايماً اللي مش على مزاجك متسمعهموش وتصمي على الي في دماغك لو
غلط

-إلهام: أنا يا ممدوح الي بصمم برضه على الي في دماغي وأنا الي بمسك في
الغلط

طب والله ما أنا

-خالد ورهف: يوووه يا ماما والنبي ما تحلفي واسمعي بقى علشان خاطرنا
وحياة تيتة عندك أسمعينا بقى

-إلهام: طيب قولوا خلينا نخلص من أم القعدة دي

-خالد ورهف: بصوا يا حبايب قلبنا أحنا مش عاوزين لبس العيد لأننا فعلاً مش هننزل من البيت وعلشان كورونا ومش هنعرف نشترى أي حاجة وكمان أحنا عندنا لبس كتير

-ممدوح: عفارم عليكم يا عيال ولاد ممدوح فعلا (الحمد لله العيال عاقلين لأبوهم)

-إلهام: انت بتقول حاجة يا ممدوح

-ممدوح: لأ يا حبيبتى ده أنا بقول عيال عاقلين
ها كملوا يا عيال وبعدين

-خالد ورهف: وبما أننا محبوسين في البيت من كورونا ولا بنخرج ولا بنروح نادي ولا بنقابل صحابنا ف أحنا هنقترح يا بابا أقترح يرضي ماما ويرضيك ويسعدنا

-إلهام: قول يا ابن ممدوح ما أنت طالع لأبوك في افتاكساته

-ممدوح: افتاكسات ايه يا إلهام بتاعتي دي ما تحسني كلامك قدام العيال

-خالد ورهف: يوووه يا ناس حرام عليكم سبونا نقول الكلمتين

-إلهام: طيب خلصوني وقولوا

-خالد ورهف: بما أننا محبوسين وكده ف أحنا هناخد فلوس لبس العيد وأقل كمان ونجيب دراع للعبة بابجي الي بنلعبها مع أصحابنا وكلبسات

للفون وكل حد فينا ياخذ 200 ج بس

تمن لبس العيد وهنشتري الدراع أونلاين يعني لا هننزل ولا هنشتري من
الشارع وبكده هتسعدونا أنا ورهف بالعيد وهنفرح أوي باللعب
بالدراعات دي

موافقين يا بابا

موافقة يا ماما وأهو تقولي لخالتو وعمتو العيال خدوا الفلوس وجابوا الي
نفسهم فيه ومجوش لبس هما أحرار وكده لا ولاد خالتي ولا عمتي أحسن
مننا

-ممدوح: أنا موافق يا ولاد هو يعني هدفك 400 ج في الزمن المهبب ده بس

حلوة الفكرة المهم تتبسطوا

ها يا إلهام ايه رأيك في فكرة الولاد

-إلهام: خلاص طالما هما عاوزين كده أنا موافقة

الي يفرحهم يفرحني

-خالد ورهف: الله عليكم وأنتم رايقين وحلوين كده

ربنا يخليكم لنا يارب

-إلهام: والكحك والبسكوت يا سي خالد ولا أنت عامل خطة مع أبوك

بقولكم ايه كله إلا الكحك والبسكوت والله لأمشي عند ماما

ولا أنا حقي مهدور في البيت ده

-خالد: يا ماما اصبري

هقولك على الكحك والبسكوت يا حبيبتى أصبري
بكراة بقى نعرف فكرة خالد ورهف للبسكوت والكحك وبالذات العيد
خلاص بعد بكراة

أنتظروني...

الحلقة الرابعة عشر

- إلهام : ها يا أبو العريف أنت وأختك هتعملوا ايه في الكحك والبسكوت
- خالد ورهف : بص يا بابا وأنتي كمان يا ماما أحنا قدامنا يوم للعيد وبابا
حالف ما حد يشتري كحك ولا بسكوت ولا حد نازل
يبقى نعمله إحنا يا حبيبتي في البيت وكده نرضي كل الأطراف
وأنا ورهف هنساعدك ونسهر معاك
- رهف: آه والنبي يا ماما زي مامة تسنيم صاحبتني بيعملوه في البيت
وبتقولي بيطلع جميل أوووي
- ممدوح : ههههههه أنا موافق يا ولاد وأنا كمان هعمل معاكم وتبقى ليلة
يا عمدة ههههههه
- إلهام : إمممم هي فكرة حلوة
بس تساعدوني كلكم علشان نلحق ننجز الكحك والبسكوت والبيتفور
- ممدوح : بيتفور ايه بقى متفقناش عليه أنا قلت كحك وبسكوت بس
ولا هي حلوانة في سلوانة وشوية و تقولي قراقيش ولا نكشير والذي منه
هما كحك وبسكوت بس بلاش خوته دماغ ومصارييف كمان
الكورونا يا ناس الرحمة
- إلهام : يووه يا ممدوح هو أنا أرضي بالهم ومش عاجبك ولا ايه

ماله البيتنفور يعني لما أعملي 2 ك مع الكحك والبسكوت هما دول الي
هيقصفوا أجل الميزانية يعني

مش تحمد ربنا إن الكورونا رحمتك 6 أني أشترتهم شوف الكحك برة بكام
ب 120 ج ولا البسكوت ب 90 ج والبيتنفور الي مش عاجبك ب 140 ج
ولا هو عند منك وخلص يا ممدوح

شوف بقى أنت والعيال يا أعملهم على بعض يا بلاش مش عاملة حاجة
والاتفاق لاغي وهروح ل ماما
ها

-خالد ورهف : يوووه تعبوتنا معاكم بقى وزهقتونا كل حاجة تتخانقوا
عليها وتعاندوا بعض

خلص يا بابا مجاش على البيتنفور يا حبيبي وبعدين رهف بتجبه
مش كده يا رهف

-رهف: أيوه يا بابا أنا مجبه ومحبش الكحك يا حبيبي

يرضيك رهف حبيبة قلبك متاكلش بيتفور إهئ إهئ إهئ

-ممدوح : خلاص بطي زن وعياط وأنتي زي أمك كل شوية تعيطي

خلص اعملوا بيتفور موافق

وأنا هعمل معاكم ونخترع بقى

-إلهام : خلاص أستبيننا وهطلب الطلبات للخبيز ديلفري بس ليا شرط
والي أوله شرط آخره نور
-ممدوح وخالد ورهف: خير يا ماما قولي الشرط خرينا نخلص
-إلهام: ممدوح تساعدني آه بس تحت رعايتي
يعني ممنوع افتكاسات يا حبيبي
ده خبيز وهنكلفه يا حبيبي والغلطة فيه بفورة
موافق يا روجي
-خالد ورهف: قول موافق يا بابا والنبي علشان نلم الليلة دي بقى
-ممدوح: موافق وأمري لله مع أنكم هتتحرموا من تاتشتي ولمساتي
العبقرية
موافق يا حبيبي
إلهام اتصلت بالسوبر ماركت وجابت الطلبات كلها
بكرة بقى نشوف هيخبزوا أزاى

الحلقة الخامسة عشر

الديلفري جاب الطلبات والدقيق والسكر والبيض ونشوف
-إلهام : رهف تعالي ساعديني في المطبخ علشان نخلص الكحك والبسكوت
رهف: حاضر يا ماما وسي خالد بقى موقعه ايه من المطبخ
-خالد: أنا هدور ماكينة البسكوت وهقطعه كله وهقطع البيتفور بالمكبس
المحاجات دي عاوزة رجالة زينا تستحمل هههههه وكده هكون
ساعدتكم النص بالنص
-إلهام: يلا يا رهف أضربي السمن والسكر بسرعة بالمضرب وضيفي البيض
خلينا نخلص البسكوت
-رهف: حاضررر يا ماما أهو شغالة شغل نار
-ممدوح: ماشاء الله عليكم منورين المطبخ والله
مش حاسين إنكم ناقصكم حاجة
-رهف وإلهام : ناقصنا ايه؟؟
-ممدوح : أنا طبعاً ولمساتي اللولبية
فسجي كده يا رهف أنا اللي هساعد ماما وأكمل عجن البسكوت
هي قلبية واحدة مني والعجينة هتبقى فل الفل
-إلهام : ياهوووي يا ممدوح

هتساعدني يبقى تحت رعايتي وتعمل اللي هقوله

أستبيننا يا دوحه

-ممدوح : حاضر يا روجي من عنيا

-إلهام : ضربت البيض والسمن والسكر كويس يلا ضيف عليهم اللين

والنشادر والدقيق وقلب يا حبي

-ممدوح : أهو يا قلبي عجينة تجنن أهو تسلم إيديك يا دوحه يا خطير

(أنا هحط شوية كاكاو سر كده من أسراري على حبة عجين ويبقى بسكوت

شوكلاتة ولا عمايل الشيف حسن)

-إلهام: بتقول حاجة يا ممدوح

-ممدوح : لا لا يا حبيبتي مبقولش حاجة ده أنا بنادي على خالد يجي يشغل

الماكينه

-خالد: أنا أهوووو تحت النظر .. وجاهز أهو

خالد ورهف قطعوا البسكوت كله ورهف سوته في الفرن ولفذوا وعدهم

وساعدوني وطلع جميل

-ممدوح: رهف لما يتبقى ربع كمية العجين قوليلي أنا اللي هقطعه في المكنه

رهف وخالد قايمين بالواجب ويبسوا البسكوت وأنا أنتهزت الوقت وعجنت

الكحك كمان وسبته يخمر على ما البسكوت يخلص

-رهف : بابا تعالي يلا ربع العجين أهو اللي قتلتي عليه

-خالد : بابا أنت ناوي على ايه

بلاش افتاكسات والنبي ل ماما تقلب العيد علينا
-ممدوح: كده برضه يا خالد مش واثق في إمكانيات بابا
-رهف: من ناحية واثقين ف أحنا واثقين في إمكانياتك وافتكاستك
ههههههه

-خالد: الحق يابابا افتكس بسرعة قبل ماما ما تخلص الفون مع خالتو
بس ايه نتفق الأول

-ممدوح: نتفق على ايه

-خالد ورهف: لو الدنيا باظت احنا مشفنكش ولا نعرف
ولو الدنيا حلوة كده وافتكاستك نجحت يبقى النجاح لنا كلنا
أتفقنا يا سي بابا

-ممدوح: اتفقنا يا ولاد إلهام

رهف هي ماما لسه بتتكلم في الفون

-رهف: آه بتتكلم مع خالتو سامية

ويحكوا في الفون عن الكحك والبسكوت وعمائل إيديها وههههههه

وأنها سابت المطبخ أمانة في إيدي أنا و خالد

ممدوح بقى ميقدرش يعيش من غير ما يفتكس

افتكس ايه بقى هقولكم فوراً

-ممدوح: رهف ناولني بسرعة الكاكو و حبة لبن صغيرين

-رهف: أستريارب

أنا مليش دعوة يا بابا يا اختراعك
أدي اللبن والكاكو أهو وأعمل الي عاوزه بسرعة
-خالد : يلا بسرعة يا بابا أخلص وأعجن بسرعة أنا مراقب ماما أهو لسه
بتتكم في الفون
ممدوح عجن كاكو مع حبة لبن وضافهم لعجينة البسكوت وبسرعة خالد
قطع البسكوت ورهف دخلته الفرن يستوي مع الكحك
-إلهام : رهف خلصتي البسكوت أنتي وخالد
ودخلتي الكحك في الفرن يستوي
-رهف: أيووه يا ماما بسوي الكحك أهو والبسكوت خلاص قرب يخلص يا
حبيبتى
أستريحي أنتي شوية على ما أخلصهم ونعمل البيتفور يا حبيبتى
(أستريارب لما ماما تشوف افتكاسة بابا)
-إلهام: ماشي يا حبيبتى بس أوعي البسكوت ولا الكحك يتلسعوا منك
-رهف: حاضر يا ماما
الوقت عدى ورهف وخالد سوا الكحك والبسكوت وكمان بسكوت ممدوح
بالشوكولاتة
إلهام دخلت المطبخ تشوف الحاجات وهوب شافت بسكوت الشوكولاتة
-إلهام: يا لهوووووي ايه البسكوت ده أنا معملىتش
ممددددووح يااااا رهف

الحلقة السادسة عشر

بعد افتاكسة ممدوح وبسكوت الشوكلاتة الي يجنن
 -إلهام : واووويا ممدوح طعمه شوكلت يجنن يا حبيبي
 تعيش وتفتكس لنا افتاكسات رووعة كده مش بتخسر يا حبيبي
 -ممدوح : أحم أحم وسعوا كده شوية لأجدع شيف في مصر
 علشان تعرفوا بس قيمة دماغى لما بتفتكس هههههه
 -رهف وخالد : ايه يا عم بابا ما أحنا معاك في الأختراع ده ولا نسيت
 جبنا الكاكو وعجنانه وأنا الي قطعته من الماكينة ولا نسيت
 -رهف : وأناااا يا بابا سويته في الفرن وخذت بالي منه
 -إلهام : خلاص كلكم نجاح جماعي
 ندخل بقى على البيتفور وندجز
 أنا هعجنه لكم وأقسمه نصين أبيض وشوكلت وخالد يقطع ورهف تسوي
 في الفرن و.....
 -ممدوح : وأناااااا أعمل أيه يا حبيبي
 -إلهام : هههههههه تاخذ بالك معاهم يا حبيبي على ما أروق الشقة بسرعة
 كده وأمسخ وأمع
 تكونوا أنتم خلصتم البيتفور

- رهف وخالد : يا لهوووووي يا بابا
 ماما هتدبجنا لما تشوف الألوان دي
- ممدوح : أسكتوا أنتم أيش فهمكم في المطبخ
- إلهام : رهف أوعي تحرقى البيتفور خلينا نخلص ونشوف الي ورانا
- رهف : حاضر ياماما
- الشقة أترتبت وخلصت والبيتفور استوى كله وريحته تجنن والقطار قرب
 خلاص
- إلهام : وروني كده ايه ده يا لهوووي بيتفور أحمر وأخضر
 يا لهووي من جوزي وعمايله
- ممدوح : طبعاً ما أنتي مش متابعة الجديد والموضة السنة دي في الوان
 الكحك والغريبة يا هانم من المسلسلات الي بتشوفها
- إلهام : مسلسلات ايه دي ده يدوب 5 مسلسلات بس شوف أختك
 بتشوف 7 ولا سامية أختي بتشوف 6 وبعدين متاخذنيش في دوكة ايه
- الألوان دي الي عملتها
 دلوقتي أختي تضحك عليا لما تشوفه
- ممدوح : أختك دي زيك مش متابعة الجديد ولا بتحب التغيير
 التغيير يا حبيبتى سنة الحياة ههههه
- إلهام : ماشي يا ممدوح ماشي

ممكن تنزل بقى تلحق تجيب لنا الفسيخ والرنجة قبل الأذان ما يأذن
ونشوف موضوع الألوان ده بعدين
-ممدوح: فسيخ ايه ده متفقناش عليه يا هانم أحنا أتفقنا على الكحك
والبسكوت بس
-إلهام: يعني ايه ده عادة زي الكحك والبسكوت وكل سنة بتجيبه لنا
أشمعنى السنة دي يعني هتمكر علينا
كل الناس جابت فسيخ ألا أنا أهى أهى
كل حاجة بجبها بعذاب وبخناق معاك
-ممدوح: يووووه زني بقى وعكنني علينا علشان الفسيخ والرنجه
وأنسي كورونا و الي أنا فيه ده
حرام عليكى ده دول وحدهم يطلعوا ب300 ج كمان
-إلهام: إهئ إهئ طول عمرك بتعكنن عليا أهى أهى
-ممدوح: خلاص هنزل أجيب ولا تزعلي يا حبيبتي وجهزي الفطار
وبعد الفطار نشوف بيتفوري الي بالألوان
-إلهام: كل سنة وأنت طيب يا حبيبي وربنا يخليك لنا
بكرة العيد ونشوف ممدوح وإلهام هيعملوا أيه

الحلقة السابعة عشر

الأذان أذن وفطرنا آخر يوم في رمضان و.....

-إلهام: كل سنة وأنتم طيبين حبايب قلبي وكل رمضان وأحنا بخير وربنا
يخليك لنا يا دوحة ياروح قلبي

-ممدوح: كل رمضان وأحنا طيبين يا حبايي وأعيش وافتكس لكم ههههه
-رهف وخالد: وأنت طيب يا بابا وأنتي طيبة يا ماما ربنا يخليكم لنا

-إلهام: أما أدوق البيتنفور الملون افتكاستك يا دوحة الي هتفضحني بيه
وسط أخواتي والمجتمع هههههههه

بيتنفور أحمر وأخضر يا دوحة يا لهووي

-ممدوح: أيش فهمك أنتي في الجديد في السوق أنا متابع الجديد السنة دي
وكله بالألوان يا حبيبتي

المهم دوقي كده وقوليلي رأيك

-إلهام: أممممم طعمه حلوي يا حيي الأحمر يجنن أما أدوق الأخضر بقى

واوو يجنن والله تسلم الأيادي يا حيي (بس هقول للناس ايه لما أقدمه لهم)

-ممدوح: بتكلمي نفسك يا حيي من الحلاوة هههههههه

-إلهام: آه آه من الحلاوة (ده أنا بفكر في الافتكاسة بتاعتك هقولهم ايه)

الحمد لله مفيش حد هيجلنا من كورونا وأسترت من عند ربنا

-خالد : بابا حبيبي فين العيدية

-رهف : وأناااا كمان يا حبيبي عاوزة العدية

-ممدوح : عديات ايه هو في حد هيخرج وبعدين أنا مش أدتكم فلوس

اللبس، مفيش عديات هو أنا هلاقيها منين ولا منين كحك وديسكوت

ورنجه وفسيوخ ولبس، هي كلمة مفيش عديات ولا في خروج من البيت

-إلهام : يوووه يا ممدوح متعكننش على العيال في العيد مجتش على العدية يا

حبيبي

-ممدوح : لأ بقي جات عليها

مفيش عديات وكلمة وقتتها وخلص في ليلتكم دي لأقلبها ضلمة

عليكم في ليلة العيد

-رهف : إهـى إهـى إهـى عاوزة عدية مليش دعوة زي صحابي

-خالد : وأنا كمان عاوز العدية يا بابا ليها مشروع عندي متكتك له

-ممدوح : مشروع ايه يا أبو مشروع ده احنا محظورين كلنا يا حبيبي في

البيت ومفيش خروج من البيت

-إلهام : يوووه يا ممدوح دايماً أنت كده تبوظ اللحظات الحلوة وتنكد

علينا

ما تديهم العيدية وأنا هعمل حسابي في ميزانية الشهر الجديد هختصر- من

المصاريف وبالذات مصاريفهم

يعني أعتبرها يا حبيبي سلفة من الشهر الجاي و...

- خالد: ماماااا سلفة ايه ياستي دي الي هتخصميها الشهر الجاي دي
 -إلهام: (غمزت بعينها ل خالد)
 خلاص يا خالد أسمع الكلام وبعدين أنت بتخرج فين يعني
 -خالد: ماشي يا بابا موافقين سلفة من الشهر الجاي مراعاة منا لظروف
 كورونا وعلو الأسعار
 -ممدوح: كده أستبيننا ومش هنكد عليكم
 نادي على رهف أختك وتعالوا خدوا العيدية
 (الواحد لازم يكون حمش وكلمته متنزلش أبداً)
 -إلهام: بتقول حاجة يا حبيبي
 -ممدوح: لا يا حبيبتي ده أنا بنادي على الولاد
 خد يا خالد عيديتك أهو 200 ج
 مخصصين الشهر الجاي
 -خالد: خلاص يا بابا لازم تفكرني وتنكد عليا
 عموما كل سنة وأنت طيب يا حبيبي
 -ممدوح: رهف تعالي خدي عيدتك يا حبيبة بابا
 -رهف: حبيبي يا بابا كل سنة وأنت معانا يا حبيبي
 -ممدوح: كل سنة وأنتم طيبين حبايب بابا

- إلهام : يا سلام مفيش عيدية لكي يا إلهام على تعبك معانا طول رمضان
ووقفتك في المطبخ
كده يا ممدوح إهئ إهئ مش مسمحاك
-ممدوح : أنتي الكل في الكل يا روح ممدوح وعيديتك أهي مجهزها يا حبيبتي
-إلهام : تسلمي يا حبيبي ربنا يخليك لنا وميحرمننا منك
-ممدوح : ويخليكي ليا
بس إعملي حسابك مخصومة برضه من مصروف الشهر الجاي
-إلهام : نعم يا سي ممدوح بتقول ايه

بكرة نكمل ونشوف ممدوح وإلهام والعيدية والعيد

الحلقة الثامنة عشر

-إلهام : بتقول ايه يا ممدوح عديتي مخصومة من مصر-وف البيت للشهر
الجاي

-ممدوح : يا حبيبتي قولي طيب صباح الخير يا حبيبي
كل سنة وأنت طيب يادوحة وتعملي لنا كوبيتين شاي وطبق بسكوت
وكحك من إيديكي الحلوة دي نفطر بيهم يوم العيد
ولا نمتي وصحيتي على النكد

-إلهام: وهو كان تمر فيك تعبي طول رمضان ووقفه المطبخ شهر بحاله وفتار
وسحور وشاي وقهوة أنت وعيالك
أخرتها تقولي عديتك مخصومة زيهم

ليه أن شاء الله وهو أنا كنت جبت لبس العيد ولا خدت منك حساب
الكوافير أنا كمان زي ما عيالك عملوا إهئ إهئ

-ممدوح : يا حبيبتي أحنا في العيد والناس صاحية بتضحك في وش بعض
ويغنوا العيد فرحة وأنتي صاحية على النكد برضه
الله يرحمه سعد زغلول لما قال مفيش فايدة

-إلهام: إهئ إهئ ما هو كله منك بتعشق تنكد عليا حتى في العيد
ومستخسر فيا عيادية وكلمتين حلوين في العيد بعد تعبي شهر كامل

-خالد : بابا مش راضي ينزلي أتمشى مع صحابي شوية في الشارع زهقت
يا ماما وصحابي أتفتت معاهم وهيعدوا عليا أقولهم ايه يعني بابا حبسني في
البيت

يرضيكي يا ماما يضحكوا عليا

-ممدوح : والله عال وكمان أتفتت معاهم وظبطت الليلة من غير إذني يا
سي خالد طيب ايه رأيك ما أنتش نازل

-إلهام : خلاص يا ممدوح سيبه ينزل شويه مع صحابه وهيلبس الكمامة
والجفلز وياخد باله
مش كده يا خالد

-خالد : آه والنبي يا بابا مش هقلع الكمامة وهاخد الكحول في جيبي
والنبي والنبي يا بابا

-ممدوح : يووووه على حنية قلبي دي الي مضيعاني معاكم
خلاص أنزل بس تاخد بالك وتعمل تباعد بينك وبين الناس مترين على
الأقل وأوعاك تشرب حاجة من الشارع سامع
خالد : حاضر يا حبيبي ربنا يخليك ليا

-رهف : عيني يا عيني على الحنية
طيب بص يا حبيبي أنا كمان هنزل أتمشى مع صحابتي وناكل جلاس بس
مش هندوب في قلوب الناس هههههه
-ممدوح: ما هي كملت يا هانم أنتي وعيالك

أفضلني أخرجي يا رَهف بنفس تعليمات خالد سامعة
- رَهف : حاضر يا حبيبي هروح ألبس صحابي قربوا يعدوا عليا
- ممدوح: والله عال حتى رَهف مضبطة صحابها
إلا أنت يا دوحة الي قاعد ومحذور
- إلهام: حبيبي يا حبيبي يا روجي
ممكن أروح شوية عند مامتي وهلبس الكمامة زي العيال
- ممدوح: ايه بتقولي ايه يا هانم

بكرة هنعرف ممدوح هيعمل أيه مع إلهام

الحلقة التاسعة عشر

-إلهام: ايه يا دوحة بقول هخطف نفسي- كده زي العيال وأخرج أروح
لمامتي في العيد وأقول ل سامية أختي تيجي معايا
-ممدوح: والله عال العال كله بياخذ قرارات وبينفذها مع نفسه ومفيش
راجل هنا ناخذ رأيه يا هانم
مفيش خروج من البيت فاهمة
-إلهام: إهئ إهئ مش فاهمة ها
وهنزل أروح ل ماما وحكلم سامية تيجي معايا
هو ايه ده مقدرتش على العيال عاوز تتحكم فيا إهئ إهئ
-ممدوح: تحكم ايه يا هانم يا عاقلة
أنا خايف على مامتك وعلى مامتي دول ناس كبار في السن المفروض نخاف
عليهم ومنروحش لهم
شفتيني روح لأمي ولا لحد من أخواتي
إعقلي يا إلهام وخافي عليهم
لكميتها فون وفهميها وهي أكيد فاهمة وخايفة على نفسها
-إلهام: بس أنا نفسي أروح ل ماما يا ممدوح وأعيد عليها دي وحشتني
ومشفتهاش من قبل رمضان

-ممدوح : يا حبيبي لازم تتحملي علشان تحميها وتكون بخير
أستهدى بالله كده وقومي كلميها وعقلي أختك سامية هي كمان
وأنا هقوم أجهزلك الفسيخ والرنجة وأحط تكات ممدوح وحركاته
ومستنيك يا حبيبي في المطبخ

-إلهام : طيب يا حبيبي هكلم ماما فون وأفهمها إني خايفة عليها وأكلم
سامية أفهمها برضه وأجيلك نجهز الغدا على ما العيال يجيوا
ممدوح دخل المطبخ وهو مبسوط لأنه عرف يقنع إلهام واليوم نفذ من النكد
اليومي

وبدأ بتجهيز الفسيخ والرنجة وطبعاً منسيش يحط افتكاساته وتكاته
إلهام : دوحة حبيبي كلمت ماما وفهمتها لاقيتها فعلا خايفة حد يروح لها
زي ما قتلي يا حبيبي وسامية كمان أقتنعت بكلامي

-ممدوح : طيب تمام تعالي بقى طلعي الأطباق على السفارة وجهزيها على ما
أكلم الولاد وأشوفهم أتأخروا ليه
-إلهام : عيوني يا حبيبي

واووايه تقطيعه الفسيخ الي تجنن دي وكمان مشهيه طحينة يا تكاتك
يا دوحة

والرنجة كمان مقطعها هههههه بالمسطرة (برضه منسيش أنه مهندس)
ومهندس لنا الرنجة

والبصل يا لهووي يجنن مرصوص أزاي كده يا حبيبي

وايه الطباق الغريب ده الي فيه طحينه وشكله غريب عن الطحينه
وفين البطارخ الي أنا جيبها
ممددووح فين البطارخ يا حيي ده أنا جيبها مخصوص العيال بيحبوها
موووت

وايه الطباق العجيب ده

-ممدووح: عجبك التقطيع والتجهيز يا روجي وشفتي رصة البصل في الطباق
مزاج يا حيي وتاتشات الشيف ممدووح

-إلهام: برضه مقلتلش فين البطارخ وايه الطحينه الغريبه دي

-ممدووح: ما هو أنا بقى عملت طبق الشيف ممدووح

هتاكلوه وتتجننوا من حلاوته

ضربت البطارخ مع الطحينه والليمون وبصلية في الخلاط وطلع الطباق
الجميل ده

-إلهام: يا لهووووووي يا ممدووووح

البطارخ راحت

آه ياني يا إلهام وعمائل جوزي فيا

وافتكاساته

أقول للعيال ايه

بكرة هنعرف العيال عملوا ايه

وافتكاسة ممدووح أخبارها ايه

الحلقة العشرون

-إلهام : البطارخ يا دوحة تضربها في الخلاط ليه
حرام عليك يا راجل ده أنا مستنياها من أول رمضان
يا لهوووي يا أناااا على افتكساتك ... طيب أسألني شور عليا
-ممدوح : في ايه يا إلهام هو أنا عملت جريمة يعني
ما الشيف شربيني عمل كده بس هو ضرب الرنجه الصراحة يعني وأنا بقى
حطيت تاتشاتي الممدوحية وعملت البطارخ
بطلي زعيق ولما تدوقي أبقى أحكمي
-إلهام: يا حبيبي يا عمري البطارخ دي تتاكل كده بحالها والواحد يحس بيها
وهي بتقرز كده في بقه مش تقولي ضربتها مع الطحينة وبقوت عجينة في
بعضها... يا عيني عليك يا إلهام من افتكسات جوزك وعميله
-ممدوح: يووووه بقى أفضلي ولولي كده وفتحي عيون العيال أنها وحشه
علشان مياكلوش وتسدي نفسهم ما أنتي كده غاوية تنكدي علينا
إلهام: أنا برضه اللي بنكد عليكم يا ممدوح
اقولك أنا اللي ضربت البطارخ وعجنتها حلو كده أرتحت
-خالد: في ايه يا ماما أنتي وبابا صوتكم طالع على السلم
هو أنتم كده علطول حتى في العيد

- إلهام : معلش يا أبني الكورونا و الحظر و عمايله مع أبوك نصيبنا نتحمل
إدعي لنا يا ابني يزيح الغمة دي
يمكن دعوتك تتقبل
- ممدوح: أنتي بتدعي عليا يا إلهام وبتقولي للواد يدعي كمان
ده أنتي بقى ناوية على نكد مفتوح (أوبن داي) كده
- إلهام : ما هو مفيش فيك فايده طول عمرك كده نيتك سيئة ودايماً ظالمني
إهـى إهـى
- ممدوح: أيوووة وبتعيطي كمان يعني تدعي الدعوة عليا وتعيطي
ده الستات دي ملهاش حل والله
- إلهام: إهـى إهـى أنا بقول ل خالد يدعي يزيح الغمة الي هي كورونا علشان
الحظر يتفك و.....
- ممدوح: كمي كمي وترتاحي من قعدتي في وشك ليل نهار مش كده
-خالد: يوووه وبعدين معاكم بقى هو أنتم مبتتعبوش
كفاية خناق بقى
حقك عليا يا بابا وحقك عليا يا ماما
النهارة عيد
خلاص يا بابا ماما مقصدتش الي وصلك
- إلهام : قول لأبوك الي دايماً ظالمني وحاططني في دماغه ولا فارق معاه عيد
ولا غيره

- ممدوح: خلاص حصل خير وسامحتها
-إلهام: نعم نعم تسامحني على ايه إن شاء الله
هو أنا اللي ضربت البطارخ في الخلاط
-خالد: البطارخ بخ
-إلهام: آه افتاكسة أبوك بتاعة العيد
-رهف: سلامو عليكم يا قمرات أنا جيت
ايه مالكم مقطعين بعض ليه هههههه
-ممدوح: مفيش يلا غيري هدومك وتعالى نتغدى
-إلهام: أه تعالي وأنتي تعرفي مقطعين بعض ليه
السفرة جهزت والأكل أتخط
الرنجة والفسيح جاهزين والطحينة كمان وافتاكسة ممدوح البطارخ
المضروبة
-خالد ورهف: واووو يا بابا البطارخ تجنن كده... تسلم إيديك وتفانينك
-ممدوح: مجديا ولاد عجبتكم
قولوا لأمكم الي منكدة عليا من الصبح
-إلهام: تسلم إيديك يا حبيبي طعمها تحفة وجديد
-ممدوح: تسلمولي وبكرة بقى هعملكم أختراع جديد
أستنوني بكرة ونشوف يوم جديد مع إلهام وممدوح

الحلقة الواحدة والعشرون

-إلهام : صباح الخير يا حبيبي
كفاية نوم بقى وكسل هو العيد قال كده قوم يلا أتنشط على ما أجهلك
الشاي والبسكوت

-ممدوح: صباح الفل حبيبي الواحد جسمه مكسر من رمضان والسهر
وبعدين فطار ايه ده أنا شعبان من أكلة رنجة أمبارح والبطارخ أختراعي
ههههههه

-إلهام: هههههه طيب قوم يلا ومتفكرنيش تاني بجريمتك بتاعة البطارخ
عاوزه أنساها ... ها

-ممدوح: جريمة يا إلهام برضه ما أنتي أتبهلتي عليها إمبارح أنتي والعيال
وكتتوا صوابكم وراها

-إلهام : (قال أتبهلت قال ده أنا والعيال بنلم الليلة علشان الجيران
ميسمعوش صوتنا)

-ممدوح: بتقولي حاجة يا روجي

-إلهام: لا يا حبيبي ده أنا بكلم نفسي بسليني هههههه

يلا تعالي جهزت الشاي والبسكوت

-خالد : صباح الخير يا ماما فين الشاي بتاعي والبسكوت

-إلهام : صباح النور يا حبيبي
ولع على الشاي وأنا هحط لك البسكوت والكحك
-رهف : وأنا كمان يا مامتي فطريني معاه
-إلهام : مفيش صباح الخير يا ماما ولا قايمة على الأكل (مفجوعة زي
أبوكي)
-رهف : صباح الفل يا مامتي وبطي تكلمي نفسك ها
عارفة أنا كلامك ده معاها هههههه
-إلهام : طيب يا ذكية افطري يلا أنتي وأخوكي وأخلصوا
-خالد : هتغدينا ايه النهاردة يا ماما
-إلهام : غدا ايه يا حبيبي أنت وهي وهو
مفيش غدا ولا هدخل مطبخ 3 أيام
أجازة يا حبيبي أنت وهي
خلاص بح قفلت البوفية وهريح
30 يوم شغالة زي الفلبينية فيه
ايه مليش نفس أريح وأشوفلي فيلمين ولا أمسك الفيس بوك بتاعي الي
قربت أنسى صفحتي شكلها ايه
-خالد : ايه يا ماما كل ده
بتحسسيني أننا خطفينك وبتعذبك

- مدوح: حبيبتي براحتك بس المفروض كنتي تعلمي لنا أكل الأول يكفيننا
وقت أجازتك وتظبطي لنا الدنيا وأعجزى براحتك
- إلهام : يا سلام يا سلام وأنا هستفاد ايه أن شاء الله
- مدوح خد عيالك كده وابعدوا عني آه وكلوا الي تاكلوه أنا مالي
ووسع كده خليني أدخل أوضتي أكلم صحابتي وأشوف الفيس بتاعي
- مدوح : اي بالراحة عليا يا حبي
- خالد ورهف : بابا ده بينها بتتكلم بجد وعملت إضراب
هنعمل ايه يا سي بابا ده أحنا هنجوع
- مدوح : فشر تجوعوا أزاي ودوحة موجود
- أنا بعون الله هأكلكم 3 أيام الأضراب بتاعها وهوريكم الشيف الي
جوايا ... روحوا اوضتكم وأنا هدخل المطبخ وهوريها
- خالد ورهف : (ربنا يستر من افتكاستك الي هتخلص علينا الله
يسامحك يا ماما سلمتينا تسليم أهالي ل بابا)
- مدوح : بتقولوا حاجة يا عيال
- خالد ورهف : لا يا حبيبي مبنقولش
- ده احنا بنقول ربنا يخليك لنا يا حبيبي
- بكرة هنشوف ممدوح افتكس ايه غداً للعيال وهل هينجح ولا هيعك
كعادته



الحلقة الثانية والعشرون

-ممدوح : تحبوا تاكلوا ايه يا ولاد من إيدين الشيف دوحة العالمي
(فرصتك وجاتلك يا دوحة والمطبخ خلي لك وتفنن تفانينك وتورب إلهام
التفانين والأفكار)

-خالد: ناخذ رأي رهف يا بابا

-ممدوح : وإلهام حبيبة قلبي ملكيش رأي ولا ايه
تحي تاكلي ايه يا حبيبتي

-إلهام : أنا مليش أي مطالب الي هياكلوه العيال هاكله

أنا عاوزة أعيش في هدوء وسلام 3 أيام إن شاء الله ماكلش خالص

وياريت متسألونيش تاني أكل ايه علشان أنا شبعت من السؤال ده 30 يوم

-ممدوح : أيه ده كله يا إلهام محاضرة علشان تقولي عاوزة تاكلي ايه

على رأي الواد خالد كنا خاطفينك وبنعذبك يعني

عموماً حقك عليا والنيعمة ما سألك تاني وابقى كي الي العيال هيختاروه

وأنا هطبخه بإديا وحياة عنيا

-إلهام : (إيدك يا لهووي على الي هيجري للعيال من إيديك دول)

ماااشي يا حبيبي ماشي المهم ايه

مدوح نزل يجيب الطلبات وتأخر شوية
-إلهام : هو ايه آخر أبوكم كده هاتيلي الفون يا رهف أرن عليه.
إلهام بترن على الفون مردش والتانية مردش والتالته رد
وقالها أهويا حبييتي على السلم أهو
-إلهام: أهلا يا سي دوحة ايه أخر كده وايه صوت الضحك الي على السلم
ده

-مدوح: دي أنغام جارتنا كانت بتسلم عليكي والكلام جاب بعضه معاها
وسألته على تسبيكة البيتزا
-إلهام: نعم يا بتاع الركن البعيد الهادي تسبيكة ايه دي الي سألتها عليها
وأنا إن شاء الله اتخطفت ولا ايه ولا دخلت في غيبوبة ما تسألني أنا يا سي
دوحة ولا تسبيكة الست أنغام جاية من الركن البعيد
-مدوح: يوووه أنتي كده يا إلهام تعشقي النكد
ركن بعيد ايه وأنغام ايه

وبعدين هو مش أنتي عاملة إضراب ومانعنا نسألك 3 أيام
-إلهام : أمممم أيوه بس مش لدرجة تسأل أنغام جارتنا
في أستثناءات برضه هسمح بيها يعني
متاخذنيش في دوكة ها وتبعدني عن الموضوع يا سي دوحة
-مدوح : خلاص يا إلهام لو قابلتها على السلم تاني هحط وشي في الحيط

مرضية

-إلهام: أما أشوف

هدخل بقى أوضتي أكمل الأستكنيص بتاعي وأهدي أعصاي من عمائك

-ممدوح: (أحسن برضه)

-إلهام: بتقول ايه

-ممدوح: مبقولش ده أنا داخل المطبخ أهو

أعجن البيتزا

ممدوح دخل المطبخ وبدأ في البيتزا

بكرة نعرف عمل ايه

وأخبار افتكاساتة ايه

الحلقة الثالثة والعشرون

- رهف: بابا يا حبيبي أجي أساعدك وأجهز معاك البيتزا والحشوات
- ممدوح: آه تعالي جهزي الزيتون والفلفل وقطعي الفراخ حنت صغيرة وشوفي أخوكي عاوزاها بايه
- رهف: خالدا عاوز البيتزا بايه
- خالد: أنا مجبها بالسجق أوعي تعملها ليا بالفراخ بقولك أهو
- رهف: طيب أنا مش هعمل حاجة أنا هجهز ل بابا الحشوات بس
- بابا خالد عاوزها بالسجق أشرتيت سجق يا حبيبي مع الطلبات
- ممدوح: جبت كل حاجة معايا زي المكتوب بالظبط
- يلا وسعي بقى وأطلي من المطبخ وسيبي الشيف دوحة يظبطلكم أحلى بيتزا ولا بيتزا هت
- رهف: (ربنا يستر) ماشي يا حبيبي لو عوزت مساعدة ناديني
- إلهام: رهف تعالي هنا
- أبوكي سيباه لوحده في المطبخ بيهب ايه روجي يلا معاه ساعديه
- رهف: يوووة يا ماما هو طردني منه بالذوق وقالي خلاص مش عاوزة مساعدة مني
- ما تروحي أنتي يا ماما بصي بصة على السريع كده

-إلهام: لأ يا حبيبتي أنا أجازة من المطبخ 3 أيام والنبي لو ولع حتى ما
هدخل أطفيه

ده أنا أتهرت منكم في رمضان
بريح يا ناس يومين أجازة يا بشر

-رهف: أنا مالي بقي وربنا يستر وبابا ميخربهاش ونلاقي حاجة ناكلها
الوقت عدى وممدوح في المطبخ ساعتين وخبط ورزع وصواني تقع وهيصه
وفجأة

-ممدوح: خالد رهف إلهام تعالوا بقي شوفوا عمايل إديا وكل واحد ياخذ
البيتزا بتاعته

يا سلام يا دوحة يا جامد أنت

-خالد ورهف: الله يا بابا شكلها تحفة السجق والفراخ بتاعتنا

وماما مرجريتنا وأنت ايه دي يا بابا

-ممدوح: عملتها بالجمبري كل واحد ومزاجه

كلوا بقي وقولوا رأيكم

-خالد: (هي تخينة أوي زي ما تكون عيش كده ليه وفيها طعم غريب
مش عارفه)

(أه يا بطني ياني)

-ممدوح: ها يا خلودة ايه رأيك

- خالد : أه حلوة يا بابا بس تخينة شوية
- ممدوح : أنت اللي مبتفهمش في البيتزا المهم الطعم أخباره ايه
- خالد: حلوة يا حبيبي تسلم إيدك بس هو في طعم غريب كده منش عارفه
- ممدوح: طعم إديا وحياة عنيا هههههه
- رهف: ايه ده يا بابا في طعم غريب في الفراخ والبيتزا تخينة أوووي
- إلهام: أوعي كده منك ليه أما أشوف بتاعتي
- أيه ده يا ممدوح البيتزا فيها طعم غريب أنت عملتها أزاي
- عملتها زي ما كتبتلك الطريقة
- ممدوح : وأعملها بطريقتك ليه هو أنتي مش إجازة يا هانم مالي ومال
- طريقتك بقي
- إلهام : ماشي يا حبيبي يا جوزي ممكن تقولنا تاتشك الممدوحي كان ايه
- ممدوح : المهم ايه رأيكم الأول في عمائل إديا
- خالد ورهف وإلهام: تجنن يا بابا
- قولنا بقي عملت ايه علشان ناكل
- ممدوح: حديكم السر بقي وأمري لله أنا حطيت زيت زيتون في العجينة
- إلهام: ها قول علطول يا حبيبي أعصابي لا تتحمل
- ممدوح: وقلت بقي يا دوحة بدل ما أعجنها بزبادي عجننتها بحليب
- وأتوصيت بزيت الزيتون في العجينة علشان تطلع هشة حطيت كويبة
- ونص

وعملت شاورمة الفراخ بزيت الزيتون علشان تبقي صحية
بس هو يعني نسيت حاجة صغيرة كده أفكرتها بعد ما رشيت الصلصة
والجبين

-إلهام : ايه يا حبيبي يا نور عيني قول

-ممدوح : نسيت الخميرة بس

-إلهام ورهف وخالد : يا لهووووووي يا أناااااا من بابا وافتكساته

أستنوني بكرة ونشوف ممدوح تاني يوم هيا كلهم ايه

الحلقة الرابعة والعشرون

-إلهام : خلاص يا دوحة الي حصل أمبارح والبيتزا الي العيال رموها
ومحدهش كلها بسبب افتاكساتك واختراعاتك ننساها يا قلبي
وخلينا في النهاردة يوم جديد يا حبيبي أتفقنا
-ممدوح : مالها البيتزا يعني كانت جميلة وطعمها جديد هو مش طعم بيتزا
يعني لكن كانت حلوة
أنتي الي مش بيعجبك اي حاجة أعملها
ده أخترع أنا عملته أسمه بيتزاوي
وبعدين أنتي مش إجازة كمان يومين يبقى مالك بقى ومال الي عمله
النهاردة
-إلهام: ما هو يا دوحة يبقى جعانة برضه وعاوزة أكل حاجة مفيدة
عموما براحتك يا حبي
-ممدوح: آه براحتي
واد يا خالد أنت ورهف هتاكلوا ايه النهاردة
رهف وممدوح: والنبي يا بابا نطلب حاجة ديلفري النهاردة بلاش تفتكس
قصدنا تتعب يعني وتعمل أكل
-ممدوح: ديلفري وأنا عايش وموجود لا ممكن أبداً

-مدوح: لا ياستي كتر خيرك وخدي أجازتك كاملة هعرف أصرف نفسي-

بنفسي ده أنا دوحة

-إلهام: ايه يا حبيبي واخد الفون معاك ليه هههههه هتدخل على اليوتيوب

ولا ايه

-مدوح: لأ لأ يوتيوب ايه ده

-إلهام: وريني كده أمال ماسكه متبت فيه كده ليه وواخده معاك المطبخ

الله ده نتفكشين من أنغام جارتنا نعم نعم وجروب ستات لكن حلوين

ايه ده يا سي ممدوح

يا نهار ملوش شمس

ممدوح طلقني بقولك

طلقننننني

بكرة هنشوف ممدوح وإلهام

وكارثة جارتهم أنغام

ولا النجرسكو كمان

الحلقة الخامسة والعشرون

-ممدوح: أنتي أتجننتي ولا ايه طلاق ايه يا مجنونة ده الي بتقوليه عيب
عليكي ووطي صوتك لالعيال يسمعوا الهبل ده

-إلهام: هبل يا سي ممدوح

آه أنا هبله ومجنونة وعاوزه أتطلق

كفاية عليك ست أنغام جارتنا وتعليقاتها ليك ولا الجروب ده كفاية
أسمه يخليني أطلق وبالتلاته قال ستات ولكن حلوين قال

إهئ إهئ

-خالد: في ايه يا ماما مالك صوتك عالي ليه وبتعيطي ليه

-إلهام: أسأل أبوك يا سي خالد وأنت تعرف بس أنا مش قاعدة له في البيت

خليه ياخذ راحته على الآخر إهئ إهئ

-خالد: كل ده ليه يا ماما بلاها نجرسكو ولا كريب ولا أي حاجة

إلهام: أتنبيل على عينك أنت كمان نجرسكو ايه يا زفت

أبعد من وشي والله ما قاعدة لكم في البيت

-ممدوح: عيب يا إلهام تعمي كده قدام العيال

تعالى نتفاهم جوه لوحدنا

-إلهام: مش هتفاهم أنا شفت الجريمة بعيني إهئ إهئ

- ممدوح : جريمة ايه يا مجنونة ده جروب وكل الناس فيه وهي بععتلي طلب
صداقة ودخلتي فيه أنتي مجنونة ولا ايه
- إلهام : ومدخلتنيش أنا ليه وأنا ست أهو زيه
- ممدوح : (أنا مش شايف أيتها ست)
إلهام : بتقول ايه
- ممدوح : بقول هو أنتي ست ده أنتي ست الستات يا حبيبتي وده جروب
طلع ولا نزل وكله مشاكل وطبخ وكده يعني
- إلهام : يبقى تطلقني يا
- ممدوح : ايه
- إلهام : تدخلني الجروب بنفسك لأروح لجارتنا إنغام وأجيبها من شعرها
وأشوف جوزها سي محي مش لامها ليه
ها قلت ايه
- ممدوح : هدخلك الجروب علشان تتهدي وتسكتي بس أنا مبتتهددش يا
هانم تجيبها من شعرها ولا قفاها حتى ولكن والله يا إلهام
لو لاقيتك بتعلقني لحد من الجيران الرجالة هتعرفني شغلك
- إلهام : جيران مين تاني
يا لهوووووي يا أناااا من الحظر وعمايه
بكرة هنشوف مين الجيران
وإلهام هتوافق على شرط ممدوح ولا هيكملوا خناق

الحلقة السادسة والعشرون

-إلهام : جيران مين دول الي في الجروب يا سي ممدوح والي مش عاوزني
أعلق لهم

-ممدوح : مفيش دي سوسن الي في العمارة الي قصادنا ومديحة الي بعدنا
بعمارتين و.....

-إلهام : نعم نعم يا هوووي سوسن ومديحة ده أنا معرفتش أسمهم ألا منك
يا سي ممدوح

كمل كمل وعرفني على ستات شارعنا

-ممدوح: في ايه يا إلهام جيرانا من زمان والحظر عرفني عليهم يا حبيبتي
وأنا بشتري الطلبات من السوق والله ستات عثلات أبقى أتعرفي عليهم

-إلهام: يا هووووووي عاوزة أتطلق بقولك

-ممدوح: طلاق ايه يا هبله أنتي وايه الي جرى، كل ده علشان جروب
وهدخلك فيه بس إياكي تعلقني لأي راجل فيه، بقولك أهو ولا هههه ولا
أغضبني ولا اي زفت، أنا حمش وبغير عليك

-إلهام: حمش وبتغير عليا يا هوووي إهـئ إهـئ وأنت مقضيها جروبات
وساييني مطحونة في رمضان وبعدين محي جوز الست أنغام ورفعت جوز
الست سوسن وتوفيق جوز مديحة مش غيرانين عليهم ليه في الجروب.. ها

-ممدوح: الله الله وأنتي تعرفي أسماء البهوات منين وأنتي مش عارفة أسماء
مراتتهم يا هانم ده أنتي يومك مهيب النهاردة وهخليه أسود من شعرك و...
-إلهام: أيووون خدني في دوكة علشان متقوليش موقف جوزاتهم
-ممدوح: ماشي يا إلهام هوووو
جوزاتهم مش معانا في الجروب هما بس لكن في رجالة غريبة في الجروب
أنتي تعرفي أسمائهم منين إنطقي
-إلهام: أي أي يا حمش بالراحة على أيدي
عرفتهم من السوق برضه يا دوحة
زيك كده بس بالإحترام آه
-ممدوح: ماشي يا إلهام اصبري عليا
-إلهام: ماشي يا حبيبي دخلني الجروب يلا ولا أقولك هات الفون كده
أدخل نفسي وأشوف الجروب
أيه ده يا دوحة عامل باس ورد للفون
إهـئ إهـئ يا لهوووي دي محصلتش من يوم ما أتجوزتك
ممدوح طلقني طلقنننني
بكرة هنكمل ونشوف ممدوح وإلهام والحظر وعمايه

الحلقة السابعة والعشرون

بعد خناقات ومشاحنات وتحقيقات إلهام هديت بس بعد ما دخلت
الجروب ووعدت ممدوح هتعلق للستات بس دخلت ممدوح شال باسورد
الفون ووعده إنه مش هتمسكه من غير إذنه
-إلهام: صباح الخير يا حبيبي أنا لاغيت أجازتي المطبخية وهجهز لكم
الأكل

كفاية الي حصل و الي جرى

-ممدوح : صباح الخير وإعملي الي عمليه

جرس الباب بيرن وإلهام في المطبخ بتجهز الفطار

-ممدوح : ممكن يا حبيبي تفتح الباب اصل ايدي مش فاضية

-ممدوح: هو يعني أنا البواب بتاعكم خلي أي حد يفتح أنا تعبان وجسمي
مكسر ولسه مفقتش

-إلهام: يووووه العيال سهرانيين للصبح ومحدش هيعبرني لو جبتلهم
ميكرفون وناديت كمان

-ممدوح: اصطبحننا واصبح الملك لله .. حاضر.. مين

-إلهام: أصبر شوية

مين يادوحة ده محصل الكهرياا

- ممدوح: هو النهاردة كام يا ريس
- المحصل: 2 في الشهر
- ممدوح: طيب لسة بدري هو أنتم بتحصلوا أول الشهر كده
- المحصل: لاء يافندم دا وصل الشهر الي فات حتى اقرأه حضرتك
- ممدوح: أيوه صح أصل أنا مبدف عش اي وصل و
- المحصل: أيوه عارف مدام الهام هي دائماً الي بتدفع لي
- ممدوح: وأنت حضرتك تعرف اسمها منين
- إلهام: ياممدوح بقالك ساعة على الباب هو وصل كهربا ولا تحقيق
- ممدوح: أصبري يامدام لما نشوف قصته ايه
- المحصل: ايه يافندم ده طبيعي لأن المدام زي غيرها في العمارة بحصل منهم كل شهر
- إلهام: ايه في ايه ياممدوح اتفضل يا أستاذ عباس
- ممدوح: وكمان تعرفي اسمه
- إلهام: استني بس ياممدوح اتفضل أستاذ عباس أشرب شاي
- المحصل: شكراً يامدام أنا ماشي كفاية كده
- ممدوح: يعني كفاية كداااا يعني
- إلهام: مالك ياممدوح أنت عاوز تعمل مشكلة و خلاص
- اتفضل أنت يا أستاذ عباس معلش

الحلقة الثامنة والعشرون

بعد الخناقات والمشاحنات والغيرة وسنينها الي جات مع الحظر

إلهام وممدوح فطروا وشربوا الشاي وهوبة

-خالد : ماما هتغدينا ايه النهاردة

-إلهام : مفيش مساء الخير صاحي على الأكل علطول (طالع لأبوك همك

على بطنك)

-خالد : مساء الخير والسعادة

ها هنتغدى ايه النهاردة بعد خناقتك على الصبح أنتي وبابا والراجل بتاع

الكهربا

ماما (بصوت واطي) بابا الحظر خلاه صعب أووي وبقى يدقق في كل حاجة

-إلهام: أيوه يا واد زي مايكون كان مسافر ومش عايش معانا

-خالد: هتأكلينا ايه بقی النهاردة

-إلهام: سبانخ

-خالد: ماما أنتي عارفة اني ماباكلش سبانخ.. طبخاها ليه بقی؟

-إلهام: عشان فيها حديد وهتقوي مناعتك من الكورونا

-خالد: وأنتي مالتيش في أكل ربنا كله حاجة تزود مناعتي غير السبانخ؟

-إلهام: والله مش عاجبك أكل أمك روح كل برة.

الحلقة التاسعة والعشرون

- إلهام : أيه بتزقق ليه بصوت عالي
-ممدوح : أنا اللي بزقق ولا أنتي وابنك اللي صوتكم جايب آخر الدنيا
ومش عارف أقعد منكم
-خالد : ألحقني يا بابا وشوف مراتك
-إلهام : هعمل سبانخ جريمة دي بزود لكم الحديد وكرات الدم الحمراء
علشان كورونا
ابنك بسلامته مش عاجبه السبانخ
-خالد: يا بابا طول عمري مباكش سبانخ وماما عارفة كده
هو أنا كنت مسافر يعني ورجعت
-ممدوح : حلوة السبانخ كلها حديد يا خالد دوقها أنت بس وهتعجبك (لم
اليوم النهاردة معاها شكلها ناوية علينا شايف ناكشة شعرها أزاى وبتبرق
لنا)
-إلهام : بتقول حاجة يا دوحه
-ممدوح : لا لا ده أنا بقنعه بالسبانخ
مش كده يا خالد
مشيها سبانخ النهاردة وأنا هعوضك

- خالد : مش واكل سبانخ ومتعملش مصلحة على حسابي ... ها
- ممدوح : مصلحة ايه يا كلب جيل منيل بستين نيلة
- طيب هتاكل سبانخ غصب عنك ... ها
- إلهام : أيوه كده خليك حمش ووريهم العين الحمراء واقف معايا إيد واحدة كده خلي العيال دي تتربي
- خالد: هنام لغاية بكرة وصحيني عالغدا لما تغيري السبانخ وربنا على الظالم والمفتري
- ممدوح: صلح الدعوة ياواد وخليها الظالمة والمفترية
- أروح أنا في الرجلين في دعوة غلط ليه هو أنا ناقص مش كفاية الحظر
- إلهام : بكرة عاملة بصارة.
- خالد : أنتي بتعانديني صح
- إلهام : مابتحبش بصارة أمك روح كل برة
- خالد : آه ماهي فرصتك وجاتلك عشان تنتقمي مني.
- خالد وإلهام مش هيخلصوا النهاردة
- بكرة هنعرف عملوا ايه

الحلقة الثلاثون

- إلهام وخالد ماسكين في بعض
وإلهام دماغها وألف سيف تعمل سبانخ وتاني يوم بصارة
-إلهام : بالظبط كده هنتقم منك أفتكربقى كل المرات الي أترىقت فيها
على أكلي عشان المطاعم كانت مفتوحة لك أفتكركل اللوبيا والمسقعة الي
رمىتهم لما طلبت دليفري
-خالد : إهئ إهئ بتنتقمي من إبنك طيب مش هديلك الفرصة تشمتي فيا
برضه وهعمل إندومي
-إلهام : رميته عشان بيحيب كورونا
-ممدوح : هو مش كان بيحيب سرطان؟
-إلهام : لا ماهو أترقى
-ممدوح : الحظر غيرك وبقيتي تقولي أفيها كمان
-خالد : أفيها ايه الي بتقولها لك يا بابا وعجباك ده وهي بتبهدل في ابنك
ومجوعاه
-إلهام: مش عاجبك إفيها أمك روح أسمع إفيها بره
-خالد: خلاص ها أكل عيش حاف فيه عيش ولا رميته هو كمان؟

-إلهام : بما إن الفرن بقى بيقتل بدري علشان الحظر انا نَشفت قلقاس
وطحنته وخبزت بيه عيش

-خالد : يالهوي على سنيني السوداء

-ممدوح : مالك ياواد بتندب زي الستات ليه

-خالد : هو فيه حد بيطن قلقاس يا ماما؟

-إلهام : الشيف حسن عملها قبل كده وأنا بقى افتكست وعملت بيه
عيش ما أبوكم من أول الحظر بيفتكس ومتكلمتش وعاجبكم أنت
وأختك ولا هو الافتكاس في إيد اليتيمة عجة

-ممدوح : لا يا إلهام بقى كده أوفريا حبيبتى وهو أي حد يعمل حاجة
نقلدها؟

فين شخصيتك المستقلة؟

وبعدين انتي مخبزتيش من سنة 90 جاية تشغلي الفرن دلوقتي بعد ما
صدى من الركنة عشان تخبزي عيش مقلقس؟

-خالد: قولها والنبي يا بابا دي بينها هتطلع الحظر عليا لوحدي

-إلهام: مش عاجبك عيش أمك روح كُل برة.

-خالد: مش واكل خالص ياماما هعمل دايت الماية عشان ترتاحي

-إلهام: والله براحتك بس قبل ما تشرب خد بالك أنا معبية الفلتر عصير
لمون عشان المناعة

- خالد : أقوم انتحر طيب؟
ما أنتي عارفه اني ماجبش الليمون يا ستي
- إلهام : مش عاجبك مية أمك روح إشرب من البحر
- خالد : أمممممم خليكي معايا ثواني
ألو.. الحجر الصحي؟
لو سمحت كنت عايز أبلغ عن حالة
أيوه يافندم أي عمالة تعطس
وتكح كحة ناشفة ودرجة حرارتها فوق الأربعين
- إلهام : انت بتبلغ عن أمك؟
- ممدوح : والله مش عاجبك حجر ابنك حجر الحكومة برة أحسن
أستنوني بكرة ونعرف خالد المسكين هيعمل ايه مع إلهام والحظر وعمايله

الحلقة الواحدة و الثلاثون

بعد خناقات وحبشتكنات إلهام مع خالد والي حصل والي جرى
نشوف

-إلهام : عاوز تبلغ عن أمك يا خالد إههه إههه

علشان طبق سبانخ ولا حتى بصارة ... يا خسارة تربيتي فيكم

-رهف : وأنا مالي بقى بتجمعي ليه أنا هاكل سبانخ وبصارة كمان

-ممدوح :آه منك يا سوسة أنتي (طالعة لناس في بالي طالعة واكله نازلة
واكله)

-خالد: أيوووه أنا بقى الابن العاق واقولك أنا اللي أكلت الجبنة .. ها

مرضية يا ماما وأستني بقى البوليس جايلك يوديك الحجر

-إلهام: إمشي يا واد من وشي على الصبح بدل ما أطلع جناني عليكم

-ممدوح: وأنا مالي يا ستي أنا راضي بالي هتطبخيه يا عنيا وبعدين مالها
السبانخ دي حتى كلها حديد

-خالد: أيوووه كده فلة هبلغ على أتنين مش واحد

يأما تطبخلي حاجة غير السبانخ

-إلهام: تصدق يا واد ياخالد صعبت عليا والدمعة فرت من عيني

-ممدوح : يا حبة عيني ما أنا كمان أكل عيشنا مقفول ومحل البلاي
 سيتشن محظور ومشروع ملاعب الترتان وحماس السباحة مع زمائلي
 محظورين يا عنيا وأنتي مش راحمة .. طالع نازل تقولي هات هات ...
 العيال محظورة وبتاكل يا دوحة ... ودوحة يجيب لما خلاص روجي طلعت
 منكم متفكر نيش يا إلهام وسيبني في غلبي ده أنا مشفتش منك طقم
 الحنية ده وأكل عيشنا مقفول يا حنية

قال سامية أختها قال يا حبة عينها مشروعها مقفول

-إلهام: يووه أنت كده ما تصدق تمسك في سلبية من سلبياتي وتفتحي فيها
 ما تتسدش .. بص بقى على بلاطة كده سامية هتغير النشاط يعني هتعيد
 تدويره

-ممدوح: نعم يا مثقفة سلبياتك وسكتنا لكن ايه دي كمان هتعيد
 تدويره دي

-إلهام : بص من الآخر كده هتغير النشاط وأنا هشاركها في النشاط
 الجديد وعاوزة فلوس منك علشان أشاركها

-ممدوح : يا لهووي على ممدوح وسنينه وعلى الغلب الي أنا فيه

وكورونا وعيالك وكمان مشروع يا إلهام

طب تعالالي بقى وأنا هخلي يومك محصلش

-إلهام : يا لهوووي يا أنا!!! يا عيال الحقوني من ابوكم

بكرة هنعرف إلهام وممدوح عملوا ايه

الحلقة الثانية و الثلاثون

ممدوح مسك في إلهام علشان قالت له على المشروع وعاوزة فلوس و
تعالوا نعرف

-ممدوح: تعالي هنا يا إلهام بقولك وقعتك سودة معايا زي شعرك كده

-إلهام: إهئ إهئ إحقوني يا عيال

طيب أهدأ بس وهشرك المشروع

-ممدوح: قصدك التدوير يا هانم ده أنا هروح فيكي السجن وأرتاح

-رهف: في ايه يا بابا مالكم

ماما بتجري كده ليه

-خالد: ههههه أنه انتقام السماء

سبحانك يارب هههههه

-إلهام: امشي يا واد أنت والبت دي من وشي وسعولي كده خلوني اجري من

أبوكم

عيب كده يا ممدوح فضحتنا الجيران سمعوا صوتي

إهدأ كده بس وهشرك

-ممدوح: جيران ها ده الي أنتي شايله همه بس

-إلهام: (يافرحة أنغام جارتنا فيا)

أهدي يا حبيبي كده وصلي على النبي بس
 -ممدوح: هيبويه اللهم صل وسلم وبارك عليه أديني أهو سكت ومش
 هجري وراكي
 تعالي بقى بالراحة كده وفهميني ايه التدوير ده
 أديني هادي أهو
 -خالد: ايه يا بابا تهدي أزاي
 الله وكمان هتسمع منها
 لا لا يا بابا مكاش العشم
 -ممدوح: إخرس يا واد متسخنيش تاني
 إلهام: بس يا واد أنت وأختك وسيبوني أتكلم
 ممدوح يا حبيبي تعالي ندخل أوضتنا على ما أجيب كوبيتين الشاي وطبق
 حاجة حلوة يستحق بقك يا روجي
 -ممدوح: ماشي يا هانم أما اشوف اخرك
 -إلهام: كيكة أهو لحبيبي وكوبيتين في الخمسينة مزاج أهو
 -ممدوح: خشي في الموضوع علطول
 إلهام: بصي يا دوحة هنعيد تدويره يعني ههغير النشاط علشان يمشي- مع
 الحظر اليومين دول
 -ممدوح: إخلصي بقولك
 -إلهام: أهو متسر بعنيش وأنا مسترسلة

احنا من الآخر كده هنعمل مشروع أكل تجهيزات أكل وأفراح كله منزلي
ويتوصل دليفري للناس وهنعمل جروب لكده والدنيا تحلو يا دوحة
-ممدوح : ها كملي كملي عاوزة الفلوس ليه
-إلهام : اصطبر منا هقول أهو
عاوزين بوتجازات وأفران وصواني والذي منه يعني لزوم الطبخ
بص بقى عاوزة 20000 ج نصيبي ها
-ممدوح : يا لهوووووي يا أناااا من مراتي
محدث يمسكني.

أستنوني بكرة وهنعرف عملوا ايه

الحلقة الثلاثة و الثلاثون

ممدوح سمع ال 20000 ج وأتجنن

وأسيبكم بقى تعرفوا بنفسكم

-ممدوح : 20000 ايه يا روجي

أستي كده أما أسلك وداني

ها أنا سمعت غلط

مش كده يا إلهام

إلهام : إهئ إهئ سمعت صح يا دوحة نصيبي معاها بالنص في المشروع

20000 ج

والنبي وافق يا حبيبي على المشروع ده بيكسب كتير

صحاب ليا أتقلوا نقلة ايه من مكسبه

-ممدوح: ده أنا اللي هنقلك نقلة إنما ايه عنب هريحك خالص

محدث يحوشي

تعاليلي هنا

-إلهام: يالهوي يا عيال الحقوني

-خالد: يووووة يا بابا كل يوم خناق تعبنا منكم وزهقت أنا شخصيا

والنعيمة لأسبلكم البيت ها

-رهف: يوووو يا بابا تعالي كلم نناه فوفة على الفون الأرضي
-ممدوح: ماشي يا إلهام إتصال ماما ده شالي عنك أخلص واجيلك عدشان
أنقلك النقلة الي نفسك فيها
-إلهام: إهئ إهئ انا كده مظلومة معاك و دايماً كاسر نفسي- وسط أخواتي
وعيلتي وعمرك ما عملتي حاجة نفسي فيها
-رهف: بس يا ماما بقى بطي عياط
اكيد بابا هيهداً ويفكر في مشروعك يا حبيبتى
-ممدوح: أيوه يا ماما أزيك يا حبيبتى وحشاني أوي
-فوقية: (ماما ممدوح)
أزيك يا حبيبي مال صوتك طالع ليه أكيد مراتك إلهام مزهقك بطلباتها
-ممدوح: مفيش يا حبيبتى أنتي وحشاني الكورونا بعدتني عنك أني اشوفك
كل يوم
-فوقية: وانت يا حبيبي وحشني موووت بس قولي مالها مراتك دي
-ممدوح: أسكتي يا ماما ده أنا مليون منها وساكت
الهانم عاوزة تعمل مشروع وعاوزة 20000 ج تدخل بيهم شريكة فيه مع
أختها سامية
-فوقية: سامية أختها الفاشلة بلا نيلة ملقتش غيرها وتشاركها
وإن شاء الله مشروع ايه ده

-ممدوح : عاوزين يعملوا مشروع أكل وطبخ منزلي كده ويوصلوا الطلبات للناس ديلفري

-فوقية : قولها تتنيل مراتك على عينها مش لما تطبخ الأول عدل في بيتها تبقى تطبخ للناس بلا وكسة

معهلش يا حبيبي بس لازم تلمها آه من الأول كده وتقولها لأ وتقول لسامية أختها خليكي في حالك وملكيش دعوة بينا

-ممدوح : حاضر يا حبيبي حلمها وهشكمها واحتمال إنقلها نقله نفسها فيها

-فوفة : نقله ايه دي مش فاهمة كلامك عموماً مع السلامة يا حبيبي

-ممدوح : مع السلامة يا ماما

-إلهام : ايوون كل شئ انكشفت وبان

أمك بتحرضك عليا أنا وأختي

أنا مش قاعدلك في البيت وهسيبه لك لغاية لما تنفذ طلباتي

اه وتعرف إن ليا أهل

-ممدوح : محدش يحوشنننني

تعاليلي بقي أنفذلك طلباتك

-إلهام : آه يا دراغي آه آه بالراحة يا دوحه آه

يا لهوووي شعري كله إلا الشعر

يا لهوووي ألحقوني يا عيال ... خالد ... رهف

الحلقة الرابعة و الثلاثون

- بعد مشاحنات إمبارح وعمایل إلهام و طلباتها الی مبتخلصش
- إلهام: كدهون یا ممدوح طب والنیعمة ما مسمحاك ها وحسیب لك
البيت وأروح عند ماما وأخليها تشوفلی حل
- ممدوح: روجی مطرح ما أنتی عاوزة ولا اقولك خلی ماما تدفعلك ال
20000 ج هههههههه (علشان تولع فیک وأخلص منكم أنتم الأثنين)
- إلهام: ماشی یا ممدوح ماشی
- ممدوح: ممدوح ممدوح یقطع ممدوح وسنینه السوداء والحظر الی مقعدنی
فی وشك لیل نهار أنتی والعیال
- وبعد شویة والوقت عدی والدنیا هدیت
- إلهام: بقولك مش عارفة التکیف مالة أنا مش قادرة الجوصعب مووت
- ممدوح: ماله الهباب مش لسة مغیرینه قریب
- إلهام: مش ده الثاني بتاع العیال
- ممدوح: مش مغیر حاجة یولع أنا التکیف
- إلهام: مالک یادوحة هو إحنا لنا غیرك هانروح لمین یعنی
- ممدوح: ایوة بلاش السکة دی معايا أنتی عارفنی بضعب بسرعة
- إلهام: یعنی بجد انا لسة بأثر فیک زی زمان

- رھف : ماما ماما ماما
- ممدوح : أسكتي العيال بتنادي
- إلهام: وايه يعني مش بتكلم مع حبيبي وحياتي
- ممدوح : ايوه يارھف تعالي يا حبيبتى الباب مفتوح بشوف بس التكييف
- إلهام: ايه يا حبيبتى عايزة ايه
- رھف : الفون مش عارف ماله
- ممدوح : أستني بس لما أشوف التكييف الهباب ده الأول
- إلهام: ماله الفون هاتي كده وريني
- ده واقف عند الأشعارات شكله عاوز سوفت وير
- ممدوح: يادي النصيبة شكل التكييف باظ يادي الداھية
- إلهام: أستني بس يادوحة هاتصل بالمهندس الي صلح الثاني
- رھف: صلح اية يا حبيبتى دا غيره خالص أنتي ناسيه ولا ايه
- إلهام: أسكتي يا بت متفكرهوش خلي المهندس يجي الأول)
- ممدوح : بتقولي اية يارھف
- إلهام: لا ياروحي دا بتتكلم على الفون هانعمل فيه ايه
- ممدوح :طيب أتصل بالهباب المهندس يجي يشوف التكييف الأول
- إلهام: حاضر برن عليه أهو فتح أهو
- الووو أزيك يابشمهندس ممكن تيجي تشوف التكييف بتاعنا أصله
- عطلان

-إلهام لا مش الي غيرناه ده بتاعنا احنا الأولاني كان بتاع الأولاد
-ممدوح : خلصي هاتي أكلمه أنا
-إلهام: أستنى ياممدوح هاتيبي أمتي يابشمهندس
ماشي بكره الصبح ... ممدوح هايبي الصبح
-إلهام: ايوه جهز مبلغ بقى علشان الظروف
-ممدوح : اي مصيبة جهز أنت اخربوا وأنا ادفع كل على دماغي أنا
-إلهام: طبعاً يا حبيبي إحنا لنا من غيرك
-ممدوح : لاء بلاش الشوية دول وأنا جسمي مش خالص
-إلهام: (البت واقفة بلاش فضايح)
إلهام خلاص يارهف هاخلي بابا يودي الفون للصيانة
-ممدوح :والله ما عندكم دم أنا في ايه ولا في ايه
لا هصلح تكييف ولا هصلح فون وأولعوا بقى.. ها
إلهام: يعني بدلع وبطبطب فيك من الصبح وتنازلت عن مشروعني وأهداني
ومش عاجب كمان
ممدووووووح طلقني
بكرة نشوف آخرة ممدوح وإلهام

الحلقة الخامسة و الثلاثون

بعد خناقات ممدوح مع إلهام والولاد بسبب التكيف والفون الي باظوا

و نشوف بقى

-ممدوح : يوووه هو أنتي كل حاجة متعجبكيش تقولي طلقني

طيب ايه رأيك يا إلهام هتهف في نفوخي مرة وأطلقك وأشوف هتعملي ايه

-إلهام : أهى إهى وأهون عليك يا دوحة تطلقني وتشت الجيران فيا

-ممدوح : آه يهون عليا علشان تحرمي تقوليها تاني

وبعدين ما لهم الجيران ما ناس زي الفل ومبسمعش صوت لجارتنا أنغام

ولا عمرها صوتها على

-إلهام: آه قول بقى أنغام هانم جارتنا بتاعة الجروب إياه مش كده

الي حضرتك منور فيه ومانعني حتى أعمل هاهاها

-ممدوح: يا نهار ملوش شمس مفيش فايده فيك ولا في دماغك

أنغام مين يا مجنونة دي

-إلهام: بتاعة الركن البعيد الهادي .. الي بتقارني بيها على علطول

-ممدوح: أنا يا مجنونة بقارنك بيها ولا بقولك ملهاس صوت ولا بتتخناق

زيك ليل نهار ... ست هادية كده في نفسها

-إلهام : ايه بتقول ايه يا

- رهف : يوووهه على خناقتكم يا ماما ليل نهار
تعالى كلمي نانا توحة على الفون الأرضي
فضحوتنا والله مع النناات والجيران
ياررب توب علينا بقى وفك الحظر
- ممدوح : يارب يا أختي هو أنا اللي حابب الحظر ده
فين أيام الكافيه مع أصحابي ولا الواحد وهو بيلاعب له ماتشين بلاي ستشن
ويغلب صحابه ولا أنزلي غطسين في البسين
هيبييه كانت أيام
- إلهام : هكلم ماما وارجعلك نشوف آخرة أنغام معاك والأيام
ألو أزيك يا ماما عاملة ايه يا حبيبيتي
- توحه: (ماما إلهام) عاملة ايه يا حبيبيتي وعيالك وممدوح وكلكم
- إلهام: الحمد لله يا ماما هعمل ايه يعني أديني عايشة أهو
- توحه: مالك يا إلهام أنا لما أتصلت كنت سامعة صوتكم أنتي وممدوح
- إلهام : إهئ إهئ يا ماما بقى عصبي خالص من ساعة الحظر وكل ما نطلب
منه حاجة يزعق ويصرخ وأجبلكم منين وأرحموني
- توحه : معهلش يا بنتي كل الرجالة كده زهقانين من الحظر والحبسة
ووقف حالهم
- خديه بالراحة يا حبيبيتي
- إلهام: منا أهو يا ماما متحملة وبدلع فيه ومش عاجبه برضه

علطول يزعق فينا زي ما أكون أنا اللي حضرته
-توحة: معهلش يا حبيبتى كله بثوابه المهم عملي ايه في مشروعك مع
سامية أختك جهزتي نفسك والفلوس
-إلهام: إهئ إهئ مرضيش يا ماما وكان هيخنقنى وفضل يزعق يوم
مش عارفة أقنعه خالص
-توحة: طيب (أنا قلت كده برضه عارفاه متبت على القرش)
عموماً يا حبيبتى مرات أخوكي أمل هتشارك أختك في مشروعها
عماد أخوكي أداها الفلوس وقالي أشوفك الأول ناوية ولا لاً
-إلهام: بتقولى مين مرات أخويا إهئ إهئ ده مشروعى يا ماما وفكرتى أنا
الى قلت ل سامية عليها تاخدها منى على الجاهز
-توحة: عماد أخوكي قرشه حاضر مش زي جوزك (ماسك فى الفلوس)
ووافق علشان يقف جنب أختك هي دي الرجالة
يلا يا حبيبتى مع السلامة وخدي بالك من نفسك وبيتك
-إلهام: مع السلامة يا ماما
ممدددح يا ممدددح
-ممدوح: ايه فى ايه علطول بتزعى كده
إلهام: طلقنى طلقنننننننى
أستنوني بكرة ونشوف ممدوح هيعمل ايه
هيطلقها ولا

الحلقة السادسة و الثلاثون

- ممدوح: ايه بتزعلي ليه
-إلهام: شوف بقى من الآخر كده طلقني
-ممدوح: إلهام أسكتي ولمي نفسك لأعملها وأطلقك بصحيح
أنتي باينك أتجننتي
-إلهام: أيوهه أتجننت منك ومن عمايلك معايا إهه إهه
-ممدوح: بتزني ليه هو أنا جيت جنبك يا ست أنتي
-إلهام: ايوه جيت جنبي وموقفتش جنبي في مشروعى وأمل مرات أخويا
عماد شاركت سامية في المشروع بعد عماد ما أداها الفلوس من سكات
ولا تقطيم
-ممدوح: آه قولي كده بقى
طب عماد أخوكي لعبة في إيد مراته ومبيتنيش لها كلمة وعلطول حاضر
حاضر إنما أنا حمش يا هانم
ومش بتاع حاضر ولا نعمين
يرضيك دوحه حبيبك يبقى لعبة في إيد مراته
-إلهام: إهه إهه لأ ميرضنيش
بس برضه لازم يشوف طلباتي ومستقبلي

-ممدوح: يا هبله لما يكون معايا فلوس زيادة هخليكي تعملي المشروع
لوحدك

-إلهام: بجدي يا دوحه طب أحلف

-ممدوح: عيب عليكي من غير حلفان كلمتي واحدة وأنتي عارفة
بس أوعي تقولي لحد وخليه سر بينا يا حبيبتني (بالذات أمك)

-إلهام: بتقول حاجة يا دوحه

حاضر يا دوحه من عنيا

قولي بقى وست أنغام دي مالك وماها

-ممدوح: تالاني يا إلهام مفيش فايده فيكي أبدا

-إلهام: يوووه بغير عليك يا دوحه

مغرش يعني

-خالد: تررررر الله عليكم وأنتم رايقين جوز كنا ريا يا ناس

-رهف: قمرات يا أخواتي وأنتم حلوين كده

-إلهام: بس يا بت أنتي وهو

هقوم بقى أجهز الاكل وأشوف هنتغدى ايه

-خالد: نتغدى كريب يا ماما نفسي- فيه من رمضان ونعمله بالفراخ

والبطاطس

-رهف: موافقة يا خالد على طلبك

-ممدوح: أعمله أنا بقى الكريب لعبتي من زمان

- رهف وخالد وإلهام : لأ بلاش أنت حرررام
تعبنا افتاكسات وإختراعات
أه يا أناااااااااا من عمايل بابا وسنينه

أنتظروني بكره ونشوف
ممدوح هيعمل الكريب
ولا...

الحلقة السابعة و الثلاثون

رهف وخالد أقنعوا باباهم ميعملش الكريب ويخلي إلهام تعمله وتتعب هي فيه

علشان يلعب معاهام بلاي ستشن

-ممدوح : يلا يا خالد جهز الماتش وأنا هكتسحك وأوريك الكرة تتلعب إزاي

بلا كريب بلا وجع دماغ

-خالد : جاهز يا بابا يلا تعالى ووريني اللعب يا دوحة هههههه

-إلهام: ممدوووويح يا ممددووح ألحقني

-ممدوح: ايه في ايه

-إلهام : حنفيه المطبخ مش راضية تفتح إيدي وجعتني وأنا بفتح فيها تعالى شوف مالها

-ممدوح: وريني كده دي متروسة خالص مين بوظها كده

روحي هاتيل المفتاح والمفك

-إلهام: مفتاح ايه يا دوحة مش عارفاه

ممدوح : يوووه أنتي خايبة كده علطول المفتاح الى كنا بنركب بيه الأنبوبة زمان

-إلهام: آه أفكرته
-رهف: ماما يا ماما
-إلهام: مالك يا بت صوتك واطي ليه
-رهف: تعالى بس أقولك حاجة
بلاش تخلي بابا يصلح الحنفية وأتصلي بالسباك فتحي أحسنلك
هيخرب المطبخ والخلاط كله يا ماما
أنتي ناسية اي حاجة بيعملها ببيوظها والخسائر بتكون كتيرة ويفضل
يزعق فينا وتتخانقوا
إلهام: أيوه يا رهف صح أبوكي ده خرابة طول عمره كل حاجة يمسكها
بيوظها وأنا خلقي ضيق وأمسك فيه وفي الآخر نجيب الي بيصلح الحاجة
والي يتصلح بقرشين بنصلحه ب 10 قروش بسبب افتكاساته
هلحقه وأقوله هكلم فتحي السباك
شاطرة يا بت فكرتيني
علشان تعرفي طيبة قلب أمك بتنسى أي حاجة
يا عيني عليكى وعلى طيبة قلبك يا إلهام
-رهف: الحقى يلا بسرعة
-إلهام: دوحة يا حبيبي بلاش أنت تعمل الحنفية وتتعب هكلم فتحب
السباك

الحلقة الثامنة و الثلاثون

ممدوح ضرب الحنفية بالمفتاح وهوب المية ضربت وغرقت الحوض وعمالة
تضرب في كل حطة ... و

-ممدوح : إلهام ألحقي المحبس بسرعة

-إلهام : يا لهوي من عمايل جوزي

ماقلتلك يا دوحة هتخربها مصدقتنيش

-ممدوح : إقفل يلا بسرعة وإخلصي قبل ما الشقة تغرق

-إلهام : حاضر أهو بقله (جوزي خرابة عمره ماعمل حاجة ونفعت)

قفلته خلاص أهو

-ممدوح : يا ساتر مش عارف مالها الحنفية دى ايه جرى لها

أخذ نفس ومش هسيبها غير أما أصلحها

-إلهام تعالي إعميلي كوباية شاي مزاج كده علشان أشغل

-إلهام : هعملك الشاي يا حبيبي بس والنبي سيب الحنفية هكلم فتحي

السباك يجي يكمل هو (أهو خربها وعلى رأي البت رهف الحاجة الي كانت

هتصلح بقرشين هتصلح ب 10 قروش)

-ممدوح : لا ممكن أبداً أنا الي هصلحها بقولك وسعى كده

-إلهام : بلاش يا ممدوح خلي اليوم يعدي ومنتخانقش مرة واحدة

- ممدوح: يوووه جينا بقى للنكد وكلامك الي ملوش لازمة
- خالد: بابا يا بابا موبايلك عمال يرن عمو مصطفى شريكك بيرن عليك
- ممدوح: مصطفى أنقذك مني أخلص منه وأرجع للحنفية
- إلهام: ماشي أنا الي غلطانة زي كل مرة
- رهف: ماما إلحقي كمي فتحي السباك بسرعة قبل بابا ما يجي تاني
- إلهام: صح يا بت يا رهف ... هاتي الفون أكلمه
- ألو أيوه يا عم فتحي عاوزاك والنبي تيجي تشوفي حنفية المطبخ
ماشي مستنياك أهو
- ممدوح شغال يتكلم في الفون ونسي الحنفية وفتحي السباك وصل البيت
و....
- فتحي السباك : ايه ده يا مدام ايه الي كسر الخلاط كده
- إلهام : خلاط ايه بس الي أتكسر دي الحنفية بس الي باظت ولا القلب
شوف كده تاني
- فتحي السباك : يا مدام بقول لحضرتك حد خبط الخلاط كسره نصين
ألا هو مين الي خبطه كده
- إلهام : يادي الوقعة السوداء والخلاط ده بكام يا عم فتحي
- فتحي السباك : معاك من 400 ج وطالع
- إلهام : يا لهووي ماله غالي كده ليه ... مفيش أسعار حنينة عن كده

-فتحي السباك : يا مدام ما أنا بقولك في ب 400 صيني
-إلهام: (صيني كمان مش كفاية كورونا والحظر وقعدة ممدوح المهيبة في
البيت)

-فتحي السباك : بتقولي حاجة يا مدام
-إلهام : مبقولش ده أنا بكلم نفسي
ثواني أجيب لك الفلوس

ممدوح يا حبيبي عاوزة 500 ج للسباك علشان انت كسرت الخلاط

-ممدوح : 500 ايه يا هانم ... مش قلتك متكلميش حد

أهو أنتي بقي بتجيبني النكد لنفسك

-إلهام : دوحة يا حبيبي عيب كده السباك بره وعاوز الفلوس وبعدين أنت
اللي كسرته كالعادة يا دوحة

هات الفلوس من سكات وبلاش فضايح

-ممدوح : فضايح ده أنتي لسه هتشوف فيها أصبري عليا

خدي الفلوس أهو ... بس مخصومة من مصروف البيت لباقي الشهر

-إلهام : يا لهوووووي يا أناااا من جوزي وعمايه

ومن الحظر وافتكاساته

أستنوني بكره ونشوف الحظر وعمايه مع ممدوح وإلهام

الحلقة التاسعة و الثلاثون

- بعد مشاحنات و حبة مشاجرات
 وإلهام غلبانة و من الحظر شقيانة
 هدت ممدوح وجبرت بمخاطره
 والحمد لله ركب الخلاط والدنيا تمام و
 -إلهام : ممدوح .. ممددوح .. ممدوح
 -ممدوح : خير .. خير في ايه
 -إلهام: الأنبوبة على وشك واللاستين خلصان وأنا عاملة صواني باشميل
 وبطاطس
 -ممدوح: حطيها في فرن البوتجاز ما أحنا عندنا غاز
 -إلهام: فرن البوتجاز بايظ وأنا شغالة على الفرن ده
 -ممدوح: طيب اعمل ايه أنا دلوقتي سايباها فاضية ليه
 -إلهام: (ما أنت مش هنا ولا دريان)
 وبتاع الأنابيب مجاش علشان كورونا
 -ممدوح: آمال كنت بتغيريها ازاي
 -إلهام: جوز جارتنا هههه عارفه
 -ممدوح : أيوه لخصي ههههه ... أي جوز فيهم بالظبط

ولعلمك بقى جارتنا هي الي بتيجى تاخدها مش جوزها
أنا كنت بغيظك
بس أنت طلعت بتشك فيا
إهى إهى إهى
مدوح طلقنننني

الحلقة الأربعون

بعد مشاحنات وحبّة فستاكنات من إلهام وآه ياني بتشك فيا يا مجنون
ومصالحات وبشتكنات من ممدوح
أتصالحوا الحمد لله و.....

-إلهام : صباح الفل يا حبيبي إصحى بقى عملتلك الفطار بقينا الظهر
-ممدوح : صباح الخير يا حبيبتى
أكبيد مصحيانى بدرى كده عاوزة طلبات من برة وكالعادة العيال نايمين
ومفيش غيري الي شقيان

-إلهام : بدرى ايه يا راجل ده أحنا الساعة 1 الظهر والعصر داخل علينا
-ممدوح : ما يخش ياستي أهو الأيام شبه بعضها ولا مستعجلة على الغدا
ليه يعنى ما أحنا أهو متهيبين فى البيت
-إلهام : ماهو أنا أصلي نازلة رايحة ل سامية أختي اقعد شوية معاها أفك
عن نفسي يا دوحة

-ممدوح : أيوه يا أختي فكي عن نفسك وجييلنا كورونا معاكي
العيال عيالها بيخرجوا ويسهروا برة ولا مراعيين حظر ولا زفت ولا أبوهم
كمان مصيبة تانية كل يوم يسهر مع أصحابه برة البيت
أكبيد حد فيهم هيجيب كورونا معاه

مفيش روح لأختك بقولك ولا هي كمان تيجي
 خلي الحظر يعدي على خير ويسترها معانا ربنا
 -إلهام : يوووه أنت كده دايماً قهرني نفسياً إهـى إهـى وكاتم حريتي
 الموضوع مش كورونا يا حبيبي ولا عيال اختي وجوزها
 دى غيرة رجالة آه أنا عارفها
 -ممدوح: أصطبجي وقولي يا صبح غيرة مين يا أختي الي بتقولي عليها دي
 فوقك كده وخدي بالك لكلامك لا والله أطلع الحظر عليك من أول اليوم
 ها

-إلهام : إهـى إهـى أنت كده لما تتزق ومتعرفش ترد
 تيجي عليا وتقولي أعمل وأسوي
 -ممدوح : مردش على ايه يا هانم وايه الي زقنى يا أختي ... ها ما تردي
 -إلهام : علشان أنت إهـى إهـى مخلتنيش شاركتها في مشروعها
 وأنت من يومها حاططها في دماغك هي وجوزها وأخويا ومراته كمان
 -ممدوح : طب لمي يومك على الصبح ومش فطران يا إلهام ولا نازل أجيب
 طلبات وهتخمد أنام وإياكي أسمع صوتك
 وكمان مفيش نزول ليكي فاهمة
 -إلهام: لأ مش فاهمة ها و
 -خالد: يوووه على الصبح خناقات
 حرام عليكم بقى ... صوتكم صحاني من النوم .. يقطع الحظر وسنينه

صدق المثل الي قال (تعرف أمك وأبوك لأ جربهم في الحظر يا معلم)
-ممدوح: أمك دي خميرة عكننة يا أبني .. شيء كده يخرجك من شعورك
قال بغير من أختها وأخوها قال
-إلهام: ماشي والنيعمة منا قاعدة لكم فيها ورايحة ل ماما و
-ممدوح : يوووووه روجي مطرح ما تروحي ... ها
-خالد : يووه يا بابا روق كده يا حبيبي وأنا هجيزلك فطار ملوكي ونفطر
سوا كده راجل ل راجل بلا ستات بلا هم
-ممدوح: ايه طقم الحنية ده مش مرتاحلك يا ض يا خالد
عموما فطرني مكان أمك الي غضبانة علطول دي
خالد عمل فطور ملوكي وكوبيتين شاي في الخمسينة و
-خالد: بقولك يا بوس
-ممدوح: قول هات ما عندك ماهو يوم باين من أوله
-خالد: بص بقى أنا عاوز أجيب عربية وسألت وعرفت ممكن.
-خالد: اي اي يا عيني
آه الحقيني يا ماما اي
طب استني اسمعني طيب
اي اي حكملك الموضوع
أقولكم أستنوني بكرة
ونشوف هيبيج

الحلقة الواحدة الأربعون

ممدوح المرة دي هو اللي بيقول ياني من عيالي وبياي من الحظر وعمايه و..

-ممدوح : بتقول ايه ياواد عربية

ده اللي ناقص كمان

والنيعمة منا سايبك تعالالي هنا

-خالد: يا ماما يا ماما الحقيني

اي اي مجاش فيا الششب ههههه

مبتعرفش تنشن يا بوس

-إلهام: في ايه

ايه الصوت العالي والحناق ده يا سي زفت خالد مش عارفة أنام منكم في

الحظر ده

-خالد: ماشي يا ماما بتألشي عليا

ألشي ألشي براحتك

منا وقعت في إيدين من لا يرحم

-إلهام: مش عاملي 7 رجالة في بعض وأحنا نفطر سوا وبا بوس والستات

منكدة علينا

إشرب بقى يا خلودة هههههه

-خالد: اي اي بلاش الشبشب يا ماما أهو رشق في راسي

آه يا دماغى نشانك عمره ما يفلت

خلاص يا ستي حقك عليا إحضرينا بقى يا ماما والنبي

-إلهام: حرمت ياواد وعرفت قيمة أمك

خالد: آه عرفت

أمك

مدوا بهم أتنين

ضحكنا بقى وأتضربت منكم نتكلم جد يا جماعة

-ممدوح: جد مين ياواد إمشى من وشي لأخلي يومك أسود زي شعر أمك

إلهام: نعم نعم يا سي ممدوح مالك بقى بتتلزق في أمه ليه وفي شعرها

أمه مخصماك

إبعد عني بقولك

-ممدوح: وهو أنا جيت جنبك يا هانم ولا

-خالد: يا ناس إرحموني بقى واسمعوني أبوس إيديكم وإهدوا شوية وكفاية

خناق أنتم الأتنين مع بعض طول اليوم

-ممدوح: إخلص يا سي زفت عاوز تقول ايه بس والنبيعمة ما تعيد كلامك

لا حتلاقي الكمودينو رشق في نفوخك

-خالد: طيب أمرى لله

بص يا بوس

-ممدوح: بوس في عينك يا زفت قولي يا بابا لأخرملك عينيك
 -خالد: حاضر يا بوس آه آه قصدي بص يا بابا أحنا هنجيب عربية بالقسط
 اي اي تاني يا بابا يوووة دي مش طريقة نقاش والله يا ناس
 -ممدوح: إعدل كلامك ياواد ومتقولش عربية دي بيجيلي منها حساسية
 -إلهام: هيببيييهي زي مشروعي كده برضه جابلك حساسية وخذت له
 تلفاست

-ممدوح: إتلمي يا إلهام وسيبيني أكلم الواد
 تعالى يا خالد نتكلم في أوضتك أحنا رجالة زي بعض ونبعد عن الإعادي
 -إلهام: بقيت إعادي دلوقتي إهئ إهئ عموماً تشكر يا دوحة أنت وإبنك
 حقيقي آخرة خدمة الغز علقة
 -ممدوح: غز

أنا وأبنك غز طيب تعالى بقى أما إديكي العلقة
 -خالد: يا لهووووووي يا ااااا

من الحظر وسنينه
 وعماميل ماما وبابا

الحلقة الثانية والأربعون

- ممدوح: نعم يا أخويا
إخلص يا واد يلا وقولي عاوزايه
- خالد: شوف يا حبيبي أحنا هنشتري سيارة أهو مقلتش عربية علشان
الحساسية الي عندك
ممدوح : ها
- خالد: هنجبها بالقسط من بنك ناصر بيقدم قروض لكده والضمان عندك
يا بابا محل البلاي ستشن أو الأرض الي أنت شاريتها
- ممدوح: عال عال ده أنت دارس الموضوع كويس ومجهز الملف أهو
أنا مش موافق يا سي زفت وأرتاح بقي
- ده الي ناقص كمان عربية وأقساط هو أنا عارف أأكلكم من كورونا
الزفت دي ولا أصرف عليكم
- يا أبني أنت مش حاسس بحاجة ما أنت زي أمك بتاكل من أتية محلولة
- إلهام: مين بيحب سيرتي ها
أدي الشاي أهو وأنا داخلة المطبخ
وهغزى الشيطان
- خالد: خير ما عملتي يا ماما
بص يا بابا يا حبيبي أنت مش هتدفع أقساط ولا حاجة
- ممدوح : نعم يا أخويا إمال ايه هناخدها ونهرب

-خالد: لأ يا بابا هنعمل بيها مشروع هنشغلها أوبر وندفع منها أقساط الشهر للبنك والباقي ينفعنا وأنا دارس المشروع كويس وحسبته بالساعة وهشغلها كام شفت وكده

ما هو يا بابا لو تهدي شوية هشرحلك الموضوع بالورقة والقلم

-ممدوح: إمام هو مشروع كويس في اليومين الهباب دول أول مرة تفكر صح يا واد

-خالد: إحم إحم شفت بقى يا بوس وأنت هادي حلو إزاي

-ممدوح: مبدئياً أنا موافق لحد ما أدرس الموضوع من جميع الجهات

-خالد: حبيبي يا بوس يا قمر أنت هجهزلك كل الاوراق وهعملك دراسة جدوى للمشروع كله

-ممدوح: دراسة جدوى كمان (ده بين العيال كبروا في الحظر وأنا مش

دريان) هيبج

-رهف: بابا يا بابا

-ممدوح: ايه داخله زي القطر كده ليه من غير صباح الخير حتى

(طالعة لأأمك مندفعة)

-رهف: صباح الخير والسعادة

وهطنش على الجملة الأستهزائية الي قلتها لنفسك ها

-ممدوح: طيب

-رهف: يرضيك يا بابا بنتك حبيبتك تبقى أقل من صحابها ويغيطوا فيا

- ممدوح : ليه عاوزه عربية أنتي الثانية
-رهف : لأ مش طموحاتي خالص
انا طموحاتي أكبر من كده عاوزه أشرفك يا حبيبي وأحقق لك أمنياتك
-ممدوح : ومال أمنياتي وصحابك
-رهف : بص بقى صحابي حولوا لإمريكن وأنا عاوزه أحول زيهم
-ممدوح : يا لهووووووي يا أي من عيالي والحظر وكورونا
محدث يمسكني ولا يحوشني
تعالى لي هنا

الحلقة الثالثة والأربعون

ممدوح الحظر عامل عمايله معاه
وولاده كمان قايمين بالواجب
وإلهام كمان يوووووه مظبطاه ... و.....
-ممدوح : أمريكيك أيه يا أم أمريكيك أن شاء الله
ده أنتي عديتي أخوكي وأمك بمراحل والله منا سايبك يا رهف
-رهف : يوووه يا بابي كله ألا أنا آه
-ممدوح : ليه إن شاء الله الأميرة ديانا حضرتك
-رهف : لأ يا بابي أنا رهف
وبعدين متهرجش في مواضيعي الحياتية الجادة
-ممدوح : حياتية كمان وجادة
لأ دي مواضيع ميتسكتش عليها
إلهام أنتي يا هانم تعالي هنا شوفي بنتك
-إلهام: في ايه صوتك مالي العمارة
الجيران يقولوا ايه علينا كده كل يوم
-ممدوح: مش هيقولوا حاجة يا أختي هما كمان صوتهم عندنا والحال من
بعضه وحظر ودابير على الجميع

تعالى شوفي بنتك وعماييلها أنا خلاص مش متحمل

-إلهام: في ايه يا رهف

ماله بابا صوته طالع ليه

-رهف: مفيش يا ماما ده أنا يدوب بقوله صحابي حولوا لأمريكن وعاوزة

احول زيهم عمل زي ما إنتي شايفة كده

-ممدوح: شفتي سيبيني عليها يا إلهام

إوعي كده بقولك

-إلهام: أستنى كده يا دوحه بس نفهم منها والي عاوزه أعمله

قولى يا رهف ودي ايه كمان

-رهف: يا ماما يا بابا دي ثانوية إمرىكية في مدرسة جود الأترناشونال

الى جنبنا هنا هحول لها من السنة الحاية زي صحابي ما عملوا و....

-ممدوح: نعم يا أختي ح

هتحولي كمان يا سلام وخدتي القرار كمان

سيبيني عليها يا إلهام بقولك

ما هي تربيتك ياهانم بانث أهي

ايه

مكنتش فاضي لكم الأيام اللي فاتت والحظر بين كل حاجة على حقيقتها

-إلهام: لأ بقى يا سي ممدوح

مالها تربيتي بقى ولا حاجات ايه اللي بانث دي

الحلقة الرابعة والأربعون

ممدوح وإلهام مسكوا في بعض كالعادة نعمل ايه الحظر وسنينه

يووووة وجة حبشتكنات و

-رهف : يوووووة بقى يا بابا

اي اي سييني أفهمك بقى

دي مش طريقة حوار متحضر مع أنسة زي

-ممدوح : كمان أنا همجي يا رهف

عال دي كملت أوووي

شوفتي تربيتك يا إلهام

-رهف : يا بابا يا حبيبي أسمعني وبلاش خناقات مع ماما

لو معجبكش كلامي خلاص

-إلهام: خلاص يا ممدوح حبة هدؤ نسمع البنت ونكمل خناق بعدين

-ممدوح : ماشي يا هانم أتريقي أنتي كمان

ما البنت طالعة لك

-إلهام : أنا اااااا ال

-رهف : أستوب بقى والنبي يا ماما سييني اتكلم أبوس دماغك يا حبيبي

وبلاش تردي عليه

- إلهام: علشان خاطرک بس هسکت أهو
إتکلمي بقى خلينا نخلص وأشوف الي ورايا
-رهف: بص يا حبيبي مش أنت نفسك أدخل كلية طب
-ممدوح: لأ نفسي تدخلي صيدلة بدل أخوكي الموكوس الي في تجارة
-رهف: ماشي يا حبيبي صيدلة
الإمريكن يا بابا فيها 6 امتحانات في السنة يعني عندي 12 امتحان في
سنتين أجيب بيهم مجموع الصيدلة وهدرس يدوب 3 مواد بس
-ممدوح: عال عال نظام حلوايه المشكلة بقى
-رهف: حضرتك المشكلة يا بابا أول ما سمعت أمريكن ومسكت فيا أنا
وماما
-إلهام: أنا ساكنة أهو وحاطة لساني في بقى
-ممدوح: هاتي الأخر يا رهف
المصاريف كام؟
-رهف: 75000 ج يا حبيبي
-ممدوح: آه في ال 3 سنين ثانوي صح
زي مدرستك كده الي أنتي فيها
مش فارقة خالص والله

-رهدف : لأ يا بابا ال **75000** في السنة الواحدة ده غير كل محاولة هتدفع

500 ج بس

ونوفر الدروس الخصوصية

-ممدوح : في السنة صح و**500** بس

آه بسيطة خالص

إلهام تعالي على جنب كده لحسن الكمودينو تيجي فيكي

محدث يحوشني ولا يمسكني

آه يا أنا انا من الحظر وعمايله

أستنوني بكرة ونشوف

الحلقة الخامسة والأربعون

بعد مناقشات وخرافات ممدوح ورهف وموال الأمريكيك دبلومة ... و....

-رهف : حرام عليكم مستقبلي هيضع

-ممدوح : ده مستقبلي أنا اللي هيضع لو دخلتك يا مفترية

مالها الثانوية العامة ها

ده حتى خلوها سنة واحدة مش زي أخوكي سنتين

-رهف : اي اي كنت هدخلك صيدلة بسهولة

-ممدوح : إمشي يا بت من وشي مفيش أمريكيك ولا نبيلة

هو باين مدارس من أصله السنة دي من الكورونا والحظر

كده كده أديكي في البيت وهتتعلمي أونلاين زي الأمريكيك بالظبط بس

أنتي أتعي شوية وذاكري وإفليجي

-رهف : ماشي يا بابي بس هاخذ دروس في كل المواد وهخربها

أي أي جات في وشي المخدة

الوقت عدى وإلهام جهزت الغدا وممدوح أتعدى وأتظبط وهوبه

-ممدوح : أنتي ياهانم يا هانم أنتي فين

-إلهام : نعم ياروحي مالك مش قولت هتنام شوية

-ممدوح : هو خالد فين مش سامع صوته

- إلهام : خالد نزل لاصحابه
 -ممدوح : نعم نعم ياروحي الي هاتطلع منك ومن عيالك
 -إلهام: مالك بس مش عارفة لما بتنام بتقوم غريب (ياريت ماتنمش
 خالص)
 -ممدوح : بتقولي حاجة على صوتك
 -إلهام: لاء يا حي بكلم نفسي
 هاتصل به دلوقتي عشان يرجع
 -ممدوح : أنتي عارفة الساعة كام داخله على 10 وأنتي مش عارفة إن في
 حظر وهباب
 -إلهام: يووووه عيالك عندك أنت حر معاهم هو في حد بيعبرني
 أنت أبوهم أنت حر معاهم
 -ممدوح : هو كل ما أكلمك تعمي الأسطوانة دي
 -إلهام: أنت اللي كل شوية تعمل حدوتة وعمايز تجر شكلي وخلاص
 -ممدوح : جرس الباب بيرن روحي افتحي الباب
 -إلهام: مش رايحه ... ها
 -ممدوح : هافتح أنا أصل في غبي هايولع في الجرس
 مين ايوه
 حسام : (صاحب خالد)

-ممدوح : خير يابني هاتولع في الجرس
-حسام : أسف ياعمو أصل خالد شد في الكلام مع الضابط شوية واخده
القسم

-إلهام: بتقول ايه ماله خالد
-ممدوح: شوفتي تربيتك يا هانم
-إلهام: هو ده وقته
خناقات قدام الواد الغريب كمان
ما تشوف أبنيك حصل له ايه
يووووة مش هنخلص من ممدوح وبعياله

أستنوني بكرة

الحلقة السادسة والأربعون

خالد وافتكاساته وحبشتكناته
 هنقول ايه ما هو ابن ممدوح و.....
 - حسام : بسرعة ياعمولسة البوكس على أول الشارع
 - ممدوح : يالا بسرعة نلحقه
 - إلهام: رايح فين يا ممدوح غير هدومك الأول يا حبيبي
 - ممدوح: ربنا يدوخصكم زي ما دوختني أنتي وعيالك
 - إلهام: أنا برضه الي مدوخصك ماشي يا دوحة مش وقته خالص
 أنا هكلم ابن خالتي يلحقنا على هناك
 - ممدوح : لاء مش عاوز حد وبذات ابن خالتك ده يا هانم
 مش قولتلك ماتكلميش ابن خالتك ده خالص
 - إلهام : يووه وقت غيرة ده يا حبيبي
 هخلي رهف تكلمه في الفون
 إرتحت كده
 يووووه بعد مشاحنات وممدوح وتحكمات وحبّة غيرة وتشنجات
 خالد رجع البيت و.....

- إلهام: شفت يا حبيبي لولا محمد ابن خالتي أتدخل كنت دفعتلك 4000
جنيه غرامة دلوقتي
الحمد لله هو و الظابط طلعا معرفة ومعملش محضر للولد
-ممدوح: أنا كنت هاخلصها بطريقتي يا هانم
-إلهام: والنبي دي مش اكلة هاتفتكس فيها (زي عوايدك)
ممدوح: بتقولي ايه سمعيني كده
-إلهام: بقولك يا حياتي أنت الخير والبركة بس المهم إن خالد متعملش له
محضر وخرج (كنت هتدبجنا لو دفعت 4000) كنت هاتسكت خالص
-ممدوح: أنا مش عارف أنتي بتكلمي نفسك كتير اليومين دول
-إلهام: يعني هو اللي بيحصل ده من امبارح مش يجنن
-ممدوح: بصي علشان نبقى على نور آخر مرة تتصلي بابن خالتك ده تاني
وتطلبي منه مساعدة
فاهمة ولا رهف ولا زفت لا والله أنتي عارفة هنيل ايه
-إلهام: تاني ياممدوح مفيش فايدة
-ممدوح: ايوه أنا مش برتاح له وأنتي عارف السبب
-إلهام: لاء مش عارفة
ده ابن خالتي ومش هاأقطعه مش كفاية عيلتك كلها أنت قطعتهم
وانا مش مستعدة أخسر عيلتي

-ممدوح: يعني بتتحديني طيب أنتي حرة بقى وأنا حذرتك
 -خالد: يعني كل يوم خناق مش عارفين نرتاح في البيت ده
 -رهف: احنا هانسييلكم البيت ده ونروح عند نناه
 -إلهام: عيشة مايعلم بها إلا ربنا
 -ممدوح: بتقولي حاجة سمعيني
 -إلهام: وأنت مش حافظ الا الكلمة دي ومركز معايا وكل شوية تتخانق
 معايا ومطلع عليا الحظر لوحدي
 وإهئ إهئ عاوز تتحكم فيا وتحبسني وتبعدي عن عيلتي
 دي عيشة لا تطاق
 -ممدوح: أيوه أنا كده لا اطاق ووريني هتعملي ايه
 -إلهام: إهئ إهئ
 ممدوووووح طلقني بقولك
 استنوني بكرة ونشوف أخرة الحظر وعمايله وإلهام الغلبانة ياااني

عملت ايه يا بابا وزعلتها على الصبح ليه (ده اليوم لسه بدري على النكد
على رأي الواد خالد)

-ممدوح : أحضروني يا عيال وأشهدوا عليها علشان لو دبحتها دلوقتي
محدش يمسكني بقولكم أهو ... يا أيامك السوداء يا ممدوح مع الست
المجنونة دي ... فك الحظر بقى يارب

-خالد : صلي على النبي يا بابا
إهدي والنبي يا ماما وأحكونا ايه الي حصل
-إلهام : إهئ إهئ و.....

-ممدوح : أتكتمي أنتس أنا الي هتكلم بصوا يا عيال أنا صحيتها من النوم
وجهزت لها فطار ملوكي وقتلتها قومي يا حبيبتي عملتلك الفطار وعينك
ما تشوف إلا النور قعدت تصوتي وتصرخ ولتكم عليا

-خالد ورهف : بس يا بابا ده الي حصل
-ممدوح : والمصحف آه

-خالد ورهف : صح يا ماما الكلام ده
-إلهام : إهئ إهئ ايوه

-خالد ورهف : يا لهووووووي يا أناااااا من الحظر وعمايله
إهئ إهئ

استنونا بكرة ...

الحلقة الثامنة والأربعون

- صبح الصباح فتاح يا عليم ويوم جديد تاني من الحظر و.....
- إلهام : بص بقي أنا مسافرة ومش قاعدة لكم تاني
- ممدوح : يعني ايه مش قاعدة تاني
- اتجننتي على الصبح
- الناس تصحى تقول صباح الخير الأول
- خالد : اية يابابا مش قادر أفتح عينيا صوتكم مسمع الدنيا
- إلهام : روح نام مش ناقصاك أنت كمان
- ممدوح : شوفت الرد على الصبح أتفرج بقي على النكد الصباحي
- خالد : خير ياماما مالك على الصبح
- إلهام: انا مسافرة عند أختي أمال اتخنقت من القعدة ومن الكل
- ممدوح :شوفت بقي الكلام الي يفور الدم والأسلوب
- إلهام:ايوه انا كده ومش مستحمله مسافرة يعني مسافرة
- رهف: والله أنا تعبت منكم مش عارفة أنا ومين عاوز يسافر في الأيام
- المهيبة دي
- إلهام: هو أنتي كمان يامفعوصه هاتتكلمي

- رهف : أنا ياماما مفعوصة ميرسي ياماما والله لاروح أنام يكش تولع الدنيا ها

- ممدوح: عجبك كده حتى البنت بتتكلم زيك وبإسلوبك

خالد: انا زي الاطرش في الزفة مش فاهم حاجة خالص

- ممدوح: ماما عايزة تسافر عند خالتك في الغردقة وتغير جو والدنيا متهيبه كورونا

ومش ناقصة هي مناعتها ضعيفة ومش مستحمة

- خالد: شوفتي يا حبيبي بابا خايف عليكي إزاي

- إلهام: مليش دعوة أنا مش صغيرة وبعرف اتعامل ازاي واخذ الاحترازاات كويس

- خالد : ياماما بالعقل كده هو ده وقت فسح وغيره

طيب إحنا بقى نعمل اية نطق إحنا كمان يا حبيبي

ما كلنا في الحظر سوا

- ممدوح : كده هاتعملي فتنه في البيت (ومش هعرف اسيطر على العيال هايعملوا زيك)

- خالد : صوتك واطي لية يا بابا مش عايزني أسمع ايه

- ممدوح: هو أنا اتكلمت بهزر مع ماما وبقولها مانقدرش نستغني عنك ولايوم

- إلهام: أيوه اضحك عليه زي كل مرة

وهو أنا محكوم عليه مؤبد اكنس وامسح وأطبخ وأطبب وخلص
حتى أشياءي مش عارفة أعملها
وكمان بتنكد عليا ليل نهار
-ممدوح : أنا برضه الي بنكد عليكي بدمتك يا شيخة
ده أنا عملتلك فطور ملوكي إمبراح فضحتني عليه
-إلهام : ما هو من سؤ نواياك يا دوحه
طيب خلاص شوف الفون بتاعك بيرن
ايه ده وريني كده مين بوسي دي
إهى إهى
ممددددوح طلقنننني
طلقني بقولك
يووووة استنوني بكرة

الحلقة التاسعة والأربعون

- إلهام شافت رنة الفون بتاع ممدوح وهوبة نشوف
 -إلهام : مين بوسي دي رد يا بيه على الفون قدامي ولا أقولك طلقني أحسن
 ولا هات هفتح أنا
 -ممدوح : تيه في ايه يا هانم دي بوسي الي كانت ماسكة محل البلاي ستشن
 أنتي نسيتي ولا أيه
 -إلهام : رد عليها قدامي يا رميو
 -ممدوح : لا ده أنتي أتجننتي خلاص ولا أقولك سافري عند أختك هدي
 أعصابك وأرتاحي (وريحي)
 -إلهام : آه عاوزني أسافر علشان يخلى لك الجو طبعاً
 مش مسافرة يا بيه ووريني الفون ده أنا هرن عليها وتكلمها قدامي
 -ممدوح : طيب عند على عندك مش طالبها ها ووريني هتعملي ايه
 -خالد: يوووه يا ماما عيب عليكي عملي كده وأنت يا بابا أهدي شوية
 وبطلوا خناق حرام عليكم مش كل يوم
 -رهف : أنا كرهت الحظر ده يارب
 نفسي أطفش بقى منهم
 -إلهام : تطفشي يا زفته وأنت كمان يا زفت

ده تلاقيه متجوزها عرفي الهانم بوسي دي وأنا نايمة على ودي
-ممدوح : عيب يا إلهام الكلام ده قدام العيال وأتقي الله يا وليه هو أنا بخرج
من البيت خالص هتجوزها أمتي دي
-إلهام : ما أنت متجوزها من زمان قبل الحظر والهانم مش قادرة على بعدك
وبتتصل بيك إهه إهه وأنا يا عيني عليا فانية نفسي- وشبابي في خدمتك
أنت وعيالك

-خالد : يا ماما إهدي بس وأحنا هنعرف ماها بوسي الزفت دي
-ممدوح : عيب يا واد وأتلم خالص وخذ اختك يلا وأدخلوا أوضكم
-رهف : يوووه بقي أحنا تعبنا وقرفنا بقي منكم (توب علينا يارب من
الحظر)

-ممدوح : عيب عليكي وأتلمي بقولك في يومك الي مش فايت ده
-إلهام : مردتش عليها ليه وهي بترن عليك ها
علشان طبعا الغلانة أنا الغلانة واقفة جنبك
بس ربنا مبيرضاش بالظلم وكشفك ليا
-ممدوح : أستغفر الله العظيم صبرني يارب على الست دي
يا هانم أنا مردتش علشان بنتخانق وصوتنا عالي عاوزة تفضحنا كمان
قدام الناس الي بتشتغل معنا
-إلهام : أنا برضه ال الي لي بفضحك ولا عمايلك يا سي دوحه

من يوم ما أتحظرننا وأنت مقضيها إشي جروبات مع الستات وإشي الست
أنغام جارتنا وجارة جارتنا، وانا أقول معهلش يا بت محظور وبيفضفض
سببيه ميضرش ومتجيش عليه، هتبقى أنتي والحكومة إهئ إهئ
إنما توصل لجواز ده الي مرضهوش أبداً .. طلقني بقولك إهئ إهئ

-ممدوح : يا ست إتقي الله وأتهدي بقى عيب عليكي

-خالد : بابا يا بابا ... خد كلم بوسي بترن على فوني وعاوزاك

-إلهام : شفتوا مش قادرة على بعده الهانم

-ممدوح : إوعي كده من وشي ... ألوأيوه يا بوسي ... الحمد لله

خير في ايه ... بتقولي ايه ... يا نهار أسود

طيب أفقلي مع السلامة أنا جايلك بسرعة

-إلهام : في ايه مالها الهانم طلعت حامل

ممدوح : إبعدي عن وشي لأقتلك يلا يا خالد ألبس بسرعة وتعالي معايا

نشوف المصيبة دي

خالد: في ايه يا بابا

-ممدوح: المحل ولع الكهربي ولعت في أوضه منه

-إلهام: يا لهوووووووي من الحظر وعمايله

استنوني بكرة ونشوف آخرة إلهام وممدوح

الحلقة الخمسون

ممدوح نزل وشاف المحل والحمد لله الخسارة مش كبيرة
والهام يا عيني رقبتهأ أد السمسة و.....
-إهام : دوحة يا حبيبي قدر ولطف الحمد لله
متزعلش يا حبيبي
ممدوح : خلاص نسيت يا إهام والحمد لله الخسارة قليلة يدوب الستارة
ولعت والدنيا أتلحقت
-إهام: بقولك يا دوحة ما تيجي كده نكسر الحظر والروتين يا حبيبي
-ممدوح: ايوه يعني نعمل ايه
-إهام: تعالي نخرج نتمشى شويه أهو نغير وشوش وأماكن
-ممدوح: هنخرج فين كل الأماكن مقفولة والدنيا حر والشمس سخنه
خلينا في البيت وخلص
-إهام: طيب يا حبيبي الي تشوفه
-رهف: بابا كلم نناه على الفون الأرضي
-ممدوح : الوايوه يا ماما أزيك يا حبيبي وحشتيني والله
-فوقية: وأنت يا دوحة يا حبيبي وحشتني أنتي والعيال
مالك يا حبيبي

-مدوح : انا تعبت يا ماما من إلهام والعيال ومش لاقى حل فيهم..أنا عايش في نكد ليل ونهار.

إلهام بتعند فيا لا بقيت عارف أكل ولا أشرب ولا أرتاح في بيتي..خناق وزعيق طول اليوم الجيران بقوا يشتكوا مننا
-فوقية : أقولك أنا تعمل ايه وأزاي تربيها وتعلمها الأدب
-مدوح: ازاي

-فوقية: هقولك ..بس تنفذ كلامي بالحرف الواحد
-مدوح : ههههه ماشي يا ماما أهو جنان ب جنان وكده كده خرابانة مع السلامة يا حبيبي

وبعد شوية مدوح رجع بسلام من بره
-إلهام: حمد الله على السلامة يا بيبي أنت جيت
-مدوح : لا ياختي لسه مجتش
-إلهام: أنت بتكلمني كده ليه يا روجي

-مدوح: بلا روك بلا زفت روجي دلوقت من وشي عاوز ارتاح شوية
-إلهام: إهئ إهئ كده يا دوحة طيب أنا في أوضتي لحد ما أعصابك ترتاح
و..

-رهف : ماما كلمي نناه توحة على الفون
-إلهام : ايوة يا ماما عاملة ايه
-توحة : مالكم كفاالله الشر..صوتكوا عالي ليه انتوا زعلانين ولا إيه؟

- إلهام : أيوة يا ماما ممدوح بقى لا يطاق خالص الحظر جننه وعمال يزعتق
فيا من غير أسباب
- ممدوح : أنا اللي اتجننت هاتي الفون ده
أيوه يا حماقي أنتي مالك أنتي؟
- توحة: مالك ياممدوح أنت بتكلمني أنا كده ازاي؟
- ممدوح: آه بكلمك كده وإن كان عاجبك
- توحة: ايه النعمة الجديدة دي ياسي ممدوح ده بينك أتجننت فعلا زي ما
بتقول إلهام
- ممدوح : هي دي النعمة الي هتسمعيها من هنا ورايح أنتي وبنتك و....
- إلهام: هات كده الفون عيب كده الي بتقوله ل ماما ده
يلا يا ماما هكلمك بعدين يا حبيبتى وحقك عليا
- توحة : طيب يا بنتي حصل خير الله يكون بعونك
- ممدوح: أنا داخل أنام وأقوم الاقي الأكل جاهز وياكم أسمع صوت
- إلهام: تنام ده ايه..ومين الي هييجبلنا الطلبات ويروح للجزار
- ممدوح : إتصرفي منا بجننك لما بنزل علشان جارتنا أنغام ولا ستات
الشارع ولا أقولك أنا أنسان الغاب طويل الناب
- إلهام: لاااا..أنت باين عليك أعصابك تعبانة..و أنا بقى مش هستحمل
كده اااا يانب إهه إهه يا حطك المهيب يا إلهام يا بختك الأسود يا خيبتك

-مدوح: قلت عايز أنام يعني مش عايز صوت..أخرجي وصوتي بره..أنا مش ناقص قرف

-إلهام : قرف! ..أنت بتقول علي قرف..طيب انا هريحك مني خالص ياسي
مدوح.أنا ماشية عشان أريحك من القرف

-مدوح: يلا في داهية وخدي الباب في إيدك عشان مش عايز إزعاج
-إلهام: إهئ إهئ طاب أنا ماشية

-مدوح: ماقتلك مع السلامة ..أنتي واقفة ليه يلا لمي حاجتك وخدي
عيالك وامشي

-إلهام: يعني مش هامك..طيب أنا هسيلك عيالك مش وخداهم
-مدوح: يلا في داهية

-إلهام : اتفضل ياسي مدوح انا ماشية وسيبهاك بيت أبويا أولى بيا
-مدوح : أحسن برضه

-إلهام: إهئ إهئ

يا خالد يا رهف تعالوا شوفوا أبوكم
وأخرة عمايله فيا

-خالد ورهف: يا لهوووووي يا أنا!!!
من الحظروعمايله

استنوني بكرة

الحلقة الواحدة و الخمسون

ممدوح سمع كلام أمه فوفة وعلم إلهام الأدب وحرمها تقول تاني هسيبك

البيت وأمشي و

-ممدوح : خلاص حرمتي تقولي كده تاني وإلا ها

هتشوفي الوش التاني

-إلهام : حرمت يا سي ممدوح

-ممدوح : وتبطي غيرة على الفاضي ونكد وتعقلي كده

-إلهام : حاضر يا سي ممدوح

هعقل وأستحمل الحظر معاك يا دوحة

ومر الوقت وإلهام وممدوح يا سلام عليهم جوز كناريا يا نااس و

-ممدوح: افتح الباب يا خالد

-خالد: أنا في الحمام خلي رهف تفتح

-إلهام : ايه الدوشة دي مالكم مش عايزين تفتحوا الباب ليه

-ممدوح: أنا رايح أهو والي على الباب مستعجل مش عارف الدنيا طارت

ولا ايه

-إلهام: خليك أنا هتنيل أفتح الباب

أيوه حاضر مين ده مش عارفة

- ممدوح: مين اللي على الباب
 -إلهام: اسكت دي أختي سامية
 -ممدوح: طيب أنا جاي اهوووو خير لسة العصر مآذنش (هو النكد جاي مستعجل ولا ايه)
 -إلهام: تعالي يا حبيبي مالك شكلك معيطة ولا ايه وايه الشنطة دي
 -خالد: اهلاً يا خالتو أنتي اللي كنتي هتولعي في الجرس
 -إلهام: اسكت ياواد لم نفسك وروح هات ميه ساقعة لخالتك
 -إلهام: تعالي ندخل الأوضة ونشوف في ايه
 -ممدوح: أهلا يا سامية مالك جاية مستعجلة في اية
 -إلهام: أنت كمان ريح شوية لما نشوف في ايه
 -ممدوح: (أكيد الهباب إبراهيم جوزها مزعلها)
 -إلهام: أصبر لما نشوف في ايه
 -ممدوح: أنا عارف هي المشكلة بتاعة كل مرة
 -إلهام: ما أنا متوقعة كده بس خليها ترتاح الأول وتقول في ايه
 -سامية: راحة ايه مش عايزة اتنيل
 إلهام: اهدي بس شوية وبعدين قولي مالك
 -ممدوح: إنتي عارف لو مد ايده عليكي والله هكسرهما له
 -إلهام: أصبر يا ممدوح شوية هي ناقصة تولع فيها
 -سامية: بص يا ممدوح أنا زهقت من عشتي خلاص إهئ إهئ

وخفت أروح عند ماما أنت عارف أخويا بيهدله وهو بيفضل مخزنلي
عمايل ماما وسامح أخويا فيه
وهو بارد ومش بيدور على حقة وغلبت فيه
-إلهام : ايوه كده فهمت برضة موضوع الميراث
-ممدوح: هو في موضوع غيره حقه وورثه في العمارة مش عاوز يتحاسب
مع اخواته برضه
وأنا كلمتة كتير ومش فاهم منه حاجة
ولا منه بيطالب بحقه ولا منه بيقول مليش حاجة
-سامية : إهئ إهئ هو ده الي مجنني ولا بناخد حاجة من الإيجار بتاع
العمارة ولا واخدين حتى مكان فيها
ولا بيروح يعرف نصيبة
بارد وتلم ولا في دماغه الدنيا
والواد حمادة ابني عاوز يعمل مشروع محل موبايلات وعاوز فلوس منه
-إلهام: طبعاً يا حبيبتي مش أبوه ولازم يديله برضه ويقف جنبه
-سامية: إهئ إهئ مش راضي يدي للواد ال **500000** ج ولا راضي يديله
محل في العمارة بتاعتهم
-إلهام : معهلش يا سامية ما هولسه مديكي **20000** ج لتدوير
مشروعك

-سامية: وهما 20000 ج دي فلوس يا إلهام ولا تعمل حاجة في الزمن ده
-إلهام: على رأيك يا حبيبتى هما دول فلوس (يا عيني عليكي يا إلهام
أتهدلتي علشانهم وفي الآخر مخدتهمش)
-سامية : بتقولي حاجة يا حبيبتى
-إلهام : أناااا لأ مبقولش ده أنا كده متعودة أكلم نفسي
-سامية : ممدوح إلهام إهئ إهئ أنا عايزة أطلق

استنوني بكرة ونشوف

آخرة العيلة دي

الحلقة الثانية و الخمسون

مدوح يا حررام يلاقيها منين ولا منين
من إلهام مراته ولا سامية أختها
و.....

-مدوح : طلاق ايه يا سامية ده أستهدي بالله كل حاجة لها حل
(دي بينها هي وأختها مجانين وأنت وقعت وسطهم يا مدوح)

-إلهام : بتقول حاجة يا حبيبي

-مدوح : لأ يا حبيبتى

ده أنا بكلم نفسي (شكلي أتجننت زيك)

-خالد: بت يارهدف شكلها خالتوها تعقد معانا

-رهدف: ايوه ياخويا أيامنا طويلة ماما وبابا وخالتو وجوزها

-خالد: ههههه أنا تمام كده هتنام معاكي مش معايا هههههه

-رهدف: لاء يافالح بابا هينام معاك أنا وخالتو وماما مع بعض

-خالد: ايون يعني أيه هدبس أنا في بابا

ومش هستحمل بابا بينام من بدري وهيكتفني ويزعق فيا

-رهدف:أنا مبسوفة فيك أبقى هاتله حبوب منومة

-خالد: ماشي أعملي حسابك خالتو بتروح الشغل في المستشفى ربنا
يسترها

-رهف: ياخبر أبيض كنت ناسية كورونا

ماما يا ماما أنا مش قاعدة في البيت ده هاروح عند نناه

-خالد: عيب يارهف تعالي نحاول تقنعها تروح بيتها وولادها وعمو
إبراهيم أولى بالكورونا

-رهف: عندك فكرة يافالح

-الهام: رهف أنتي يا بنت

- رهف: ايوه ياماما

-إلهام : تعالي امسكي خالتو وخديها أوضتك ونادي على خالد يودي لها
الشنطة جوه الأوضة

-خالد: أنا مش ماسك حاجة

-رهف: ولا أنا كمان

-سامية: تعالي ياروحي ده أنتي حتى مسلمتيش عليا

-رهف: لاء ياخالتو بس إحنا مش بنسلم علشان كورونا

-الهام: بتقولي اية ياغيبية دي خالتو برضة

-خالد: مايمنعش ياماما خالتو جاية من بره ومش عارفين سلمت على مين

-سامية: أقولكم والله أنا همشي أنا غلطانة إني جيت من أصله

الحلقة الثالثة و الخمسون

بعد حورات وحبشتكنات من رهف وخالد سامية خالتهم زعلت وحلفت
ما تبات عندهم و.....

-ممدوح: صباح الخير يا إلهام مالك شدة العزم على الصبح ورايحة فين
-إلهام : منمتش طول الليل يا دوحة بفكر في سامية أختي وأنها مشيت
زعلانة

-ممدوح: كله من مقاصيف الرقبة عيالك دبوها في وشها
(هههههه عيال ممدوح بصحيح)

-إلهام: آه لما يعملوا مصيبة بيقوا عيالي ولما بيقوا فالحين بيقوا عيالك
وعجبي يا دوحة

أنا هنزل أروح لها عند ماما أصلحها

-ممدوح: طيب خدي بالك من نفسك
وعدى الوقت و.....

-سامية : ايه الي نزلك على الصبح يا إلهام كده

-إلهام: جيت أصلحك يا أختي وأتأسف لك من عمايل عيالي

-سامية: مش زعلانة ولا حاجة

-توحة: (ماما إلهام) عيال لسانهم فالت زي أبوهم

عاوزين تربية وقرصة وذن يا إلهام
-إلهام: لا يا ماما معندكيش حق في كده ماله ممدوح بقى
-توحة: ملوش يا أختي بس برواي ولسانه متبري منه وعياله زيه
-إلهام: عاجبك كده يا سامية وأنا صاحبة منمتش طول الليل علشان أجي
أصالحك وأراضيك
-سامية: خلاص يا ماما أسكتي بقى وبلاش تضايقي إلهام
-توحة: منا ساكتة اهو وحاطة لساني في بوقي (يا ميللة بختك يا توحة في
جواز بناتك الأثنين)
-إلهام: قصدك أيه يا ماما ماله ممدوح إن شاء الله
-توحة: أنا لا شفت حاجة ولا سمعت
-سامية : يووووه يا ماما أنا ضغطي عالي ومش ناقصة ونازلة أهو ورايحة
بيتي
-إلهام: شفتي ايه يا ماما
أستني يا سامية متنزليش إلا لما أعرف كل حاجة
-سامية : ايه حبستي هنا ولا ايه يابنتي شيلى إيدك خليني أنزل
-توحة : بصوا بقى أحنا عيلة واحدة والمفروض منخبيش حاجة على بعض
ونكون صريحين
-إلهام : في ايه يا ماما خضتيني

الحلقة الرابعة والخمسون

- إلهام خدت في وشها وسابت سامية ومشاكلها وهوبة
- ممدوح: أيه مالك داخله زي القطر كده ليه وعينيك حمراء بتطق شراريا
ساتر يارب
- إلهام: أيه مالك مخضوض كده ليه؟ ماتقول وتخلص مخبي ايه؟
- ممدوح: أقول ايه أنتي أتجننتي ولا ايه ولا كتر الحظر أثر عليكي
- إلهام: ماما وأخواتي عندهم حق قولها يلا على بلاطة انك متجوز عليا يا
دنجان
إهئ إهئ
- ممدوح: أنتي أتجننتي ولا ايه دول أكيد بيهزروا معاكي
- إلهام: لا يا حبيبي مش بيهزروا إهئ إهئ
- ممدوح: إتعدلي يا إلهام بدل ما أعدلك أنا
هتبقى أنتي والحظر عليا ولا ايه
ده أنتي بقيتي لا تطاقي
الظاهر أنا اللي هسيبك البيت وأروح ل ماما
- إلهام: أيووه بتتلحكك علشان تروح لها وتقعدها معاها إهئ إهئ
- ممدوح: لا ده أنتي لسعتي فعلاً وشكلي كده أنا اللي هطفش

الحلقة الخامسة والخمسون

ممدوح طفش من إلهام وعمايها

والحظر وسنينه

و..... نشوف

-ممدوح : فهمتي يا هانم يا عاقلة يا رزينة ولا أي حد يقولك كلمتين
تصدقيه

بقي يا مجنونة علشان كنت بحاسب البت بوسي الي ماسكة محل البلاي
ستشن وبديها الفلوس أبقى أتجوزتها خلاص

-خالد : فعلا يا ماما بابا عنده حق وأنتي كبرتي على كده برضه

-إلهام : كبرت ايه يا سي زفت أنت كمان أسكت وخليك في خيبتك

-ممدوح : أنت كمان عال يا هانم

مين الزفت الأولاني

ردي

-رهف : مش قصدها يا بابا دي ذلة لسان منها

مش كده يا ماما (لمي الدور بقي يا ماما وأختصري النكد شوية)

-إلهام : (حتى أنتي يا مقصوفة الرقبة)

حاضر يا دوحة ححك عليا ولاهتسمعلي صوت تاني..ومش هتسمع غير

حاضر ونعم..والنبي ماتزعل وحياة أغلى حاجة عندك

-ممدوح : معنديش حد غالي

ده أنتي كرهتيني في البيت

-إلهام :طيب أعمل ايه علشان تصدق أي ندمت وهصلح كل غلطي ومش

هزعلك تاني

-ممدوح :متعمليش خلاص

-إلهام : يعني ساحتني خلاص

-ممدوح :ماقلنا خلاص بقى ..ربنا يهديكي..بقولك ايه

-إلهام : ايه؟

-ممدوح : خشني جيبيلي من الي معاكي 5000 ج عاوزهم

-إلهام: يا لهووي عاوزهم في أيه

-ممدوح : ايه فيه ايه..مالك بتصرخي ليه؟

وححك عليا خلاص وتبت يا دوحة

علشان خاطر خالد ورهف

يبقي تحطب لسانك جوه بؤك وصوتك ميعلاش في البيت تاني ..أنتي فاهمه؟

-إلهام : إهئ إهئ فاهمة يا دوحة

بس بستفسر يعني عاوز الفلوس في ايه

الحلقة السادسة والخمسون

بعد مناقشات وشوية حبشتكنات

وحبة قفشات من ممدوح

إلهام عرفت حيودي الفلوس فين

و..... تعالوا نشوف

-ممدوح: فهمتي يا بحر المفهومية الفلوس هاخدها ليه

-إلهام: فهمت يا دوحة بس أنت الحظر غيرك يا حبيبي وبقيت بتكيد فيا

-ممدوح: لا اسم الله عليكي متغيرتيش خالص وماشية في البيت كده نسمة

لا بتهشي ولا بتنشي ولا الجيران سامعين صوتنا

-إلهام: أناااااا يا دوحة

-ممدوح: ايوة أنتي حتى افتكاساتي المطبخية منعتيني منها وفضحتني عند

العيلة كلها

-إلهام: بطل إسلوبك المستفز معايا و...

-ممدوح: شايفه نفسك يا إلهام بطلتي تهتمي بيا بين الحظر زهقك مني ولا

بتهتمي بنفسك وايه كمان الربطه إلي أنتي رابطها دي ليل نهار على شعرك؟

ده منظر ده؟

-إلهام: ايه عندي صداع أنت مالك بتضحك على ايه؟

- ممدوح : برجع بذاكرتي لوراء وبضحك على نفسي
- إلهام : سلامتك يا بيبي أنت اتجننت ولا إيه هههههههه
- ممدوح : بفتكر لما كنت هتجنن عليكي زمان و هموت واعرفك وتخبيني
- إلهام : أيوه طبعاً.. كنت هموت عليا وكنت بتعاكسني وتمشي ورايا
وتفضل تبحلق فيا بالساعات
- ممدوح : الظاهر بقى الواحد كان عبيط
- إلهام : ليه ان شاء الله
- ممدوح : كنت فاكر إن الجواز حلو وهتفضلي تتدلعي ليا مش محبالي
راسك بالبتاع الي عليها ده (وبقيتي شبه عم يحيي البواب)
- إلهام : يا سلام وأنا كمان كنت فاكرة إنك هتفضل تحبني مش تكديني كل
يوم ببوسي وجارتنا أنغام
إهى إهى
- ممدوح : أتكتمي واوعاكي تعيطي ها مش عاوز وجع دماغ
ألا ليه احنا بقينا كده يا حبيبتى
إلهام : كده الي هو ازاي يعني
- ممدوح : الي هو طول اليوم زعيق و خناق وصوت عالي ونقار في بعض
- إلهام : مش عارفه يمكن من الحظر يا حبيبي وأنك في وشنا ليل نهار
- ممدوح : ممكن برضه أول ما الحظر يفك ناخذ لنا أجازة نساfer فيها نغير
جو نبعد شوية عن الضغوط والمشاكل ونعيش لنا يوم غسل يا حي

-إلهام : سفر ايه بس يادوحة احنا ناقصين مصاريف
ده يدوب الحظريفك من هنا وأنزل اشترى حنتين هدموم للعيال
وأنا كمان أجيبلي طقمين حلوين وأشيل القمطة من على راسي
وعاوزه أشترى طقمين ملايات و.....
-ممدوح : إلهام بقولك غوري من وشي الساعة دي
يقطع الجواز والي يتجوزوه
واقولك ويقطع العيال ويقطعني أنا كمان
يا لهوووووووي من مراتي وأيامي معاها و....

أستنوني بكرة ونشوف

الحلقة السابعة والخمسون

بعد حورات ومشاحنات وحبّة شجارات و.....

نشوف

-إلهام: صباح الخير يا حبيبي

أنت لسه زعلان من امبارح

خلاص أنا فكرت في كلامك يا حبي ولاقتني غلطانة

-ممدوح: طيب أنا نسيت خلاص موضوع السفر ده

نفسى أتسدت خلاص

ماهو يا إلهام الانطباع الأولاني هو اللي بيدوم

هيفيد بأيه إنك فكرتي بعد ما ديبتي الكلام زي الدبش امبارح

-إلهام: خلاص يا بيبي بقى

أيه ده يا ساتر يارب مال العيال شابطين في بعض ليه وصوتهم عالي

يا خالد يا رهف تعالوا هنا

في ايه

-خالد: أصل يا مااا أنااا ...

-رهف: أسكت أنت خالص أنا اللي هتكلم

-إلهام: ايه اي زفت فيكم يتكلم ويقول في ايه بتتخانقوا ليه

-رهف : سي خالد يا ماما عاملي رميو وبيكم سهى صاحبتى فى الفون

وبيتسهوك لها وسهى قالتلى

-خالد: محصلش ده أنا كنت بسألها على حاجة واحد صاحبي عاوزها

-إلهام: حاجة ايه يا مسهوك (ما أنت طالع لأبوك سهن) ومتسألش أختك

ليه ولا حتى تخلى أختك تسألها هي

-رهف : قوليله يا ماما

-خالد : أسكتى أنتى أحسنلك

-إلهام: بتزق فى أختك قدامى ده أنا هنادي لك أبوك بقى يشوف له حل

فيك

ممدوح تعالى شوف عيالك

-ممدوح: خير فى ايه

مالك صوتكم جايب آخر الدنيا

يا فرحة الجيران فينا

-إلهام : هو ده اللي هامك الجيران وست أنغام وبلاوي عيالك مش فى

دماغك

متخافش يا بيبى صوت الجيران عندنا برضه ما هو الحظر مخلاش حد

صوته واطي

هنطق يا خويا كلنا و.....

-مدوح : يادي أنغام ويادي الحظر وسنينه معاكي (توب علينا يارب وفكها
من عندك)

-إلهام : أميين يا خويا

يفكها علينا كنا هو الحظر ده طالك بس ما أنا كمان هطق من جنابي

-مدوح : أه قولي كده بقى

مش طيقاني ولا طايقة قعدتي في وشك

أهو الحظر ده طلع الي جواكي يا هانم وأنا الي أهبل وبفكر أسعدك وأخليك
تسافري يومين

-إلهام: اه منا حسافر برضه بس عند اختي آمال في الغردقة يومين كده أما
يفكوا الحظر أشم نفسي و.....

-مدوح: سفرايه مفيش سفر وهتشوفي كلمتي يا هانم

-إلهام: لأ بقى حسافر يومين من حقي أغير جو وأرجع لك ريفرش كده
ونعنوشة يا بيبي

-مدوح : ذكي كسر ححك يا هانم مفيش سفر وأنا الي هسافر ومن بكرة
كمان وحسيبللك البيت تمرحي فيه براحتك

(هتبقى أنتي والحظر)

-رهف: يا بابا يا ماما

حرام عليكم كل شوية خناق ونسيتوا موضوع خالد وسهى صاحبتى

-خالد : (ده أنتي نكد زي ماما)

ده أنا ما صدقت مسكوا في بعض ونسيوا موضوعي
 خلاص يا بابا يا حبيبي أنت البوس هنا والقائد لهذا المنزل ومن حقك
 الشرعي تسافر تغير جو يومين كده و
 -إلهام : نعم يا سي خالد يا ابن ممدوح حق مين الشرعي يا أخويا سمعني
 كده تاني
 -خالد : وأنتي كمان يا ماما حقك الشرعي تسافري برضه ل خالتو وتغيري
 مكان وترجعي رفرش
 -رهف: لأ بقى ده بقى جنان في جنان
 ايه ده حقك وحتي
 وأنا حقي فين بقى هو أحنا في أوروبا كل حد فينا يسافر لوحده
 ايه يا بابا أيه يا ماما
 جرالكم ايه الحظر غيركم ليه وخلاكم مش طايقين بعض
 ويا لهوووووي يا أناااا
 من عيلتي ومن عمايلها
 وأستنوني بكرة

الحلقة الثامنة والخمسون

ممدوح وإلهام قرروا يعلنوا الهدنة مع بعض لحد ما أيام الحظر تعدي على

خير و.....

-ممدوح : تعالى هنا يا سي خالد وقولي مالها سهى صاحبة أختك وأيه

موضوعها معاك

-خالد : ولا موضوع ولا حاجة يا بوس

دي البت رهف نكد زي ما أنت عارف كده

جينات وراثية سبحان الله بتجري في عروق ستات عليتنا

-ممدوح : أتلم يا واد لأمك تسمعك وتخلي أيامك أسود من شعرها

مالها البت سهى ومالك

-خالد : مفيش يا بوس ده أنا كنت هسألها على الأمريكن دبلومة علشان

أخت حسام صاحبي مش أكثر

رهف النكد بقى كبرت الدنيا وخلص

-ممدوح : ماشي يا خويا هصدقك المرة دي سامع المرة دي بس

لو عاوز معلومات تاني خلي أخت حسام تكلمها بنفسها لأقرص لك

ودانك

-خالد : حاضر يا بوس

الحلقة التاسعة والخمسون

بعد خناقات وشوية حبشتكنات

ممدوح صالح إلهام

و.....

-إلهام: صباح الخير يا حبيبي

-ممدوح: صباح النور يا حبيبتى.. خير لابسه كده ورايحة على فين؟

إلهام: رايحة ل سهام صاحبتي أشوف الكارثة اللي حصلت لها

بس أعملي ساندوتشين بسطرمة حلوين من إيديك وكوباية شاي

-ممدوح: بالهنا والشفاء يا ستي.. كُلي واتهني وبرطعي.. هيصي مع الطعام

والشراب المختلف ألوانه وقوامه وأصر في من الأموال ما شئت ما هو في ثور

مربوط في ساقية عمال يلف ليل ونهار علشانك أنتي وعيالك

إلهام: دلوقتي بقوا عيالي.. كنست عليك السيدة يا شيخ... طب أنا راضية

ذمتك

-ممدوح: ما لها ذمتي سببها في حالها هي كمان محظورة اليومين دول

-إلهام: شفت جوز سهام الواطي أبو عين فارغة اتجوز عليها

ممدوح: وبعدين

- إلهام : وبعدين ايه بقولك أتجوز عليها وأنا رايحة أهديتها ونشوف لنا حل فيه أبو عين زايغة ده
- ممدوح: تهديها في ايه مش فاهم يعني هو أتجوز عليها عادي يعني
- إلهام: عادي أنت بتقول عادي
- ممدوح : ايه في إيه إنتي بتحلقيلي كده ليه
- إلهام : ببخلقك ياسي دوحة ليه هو أنت ممكن تفكر تتجوز علياً
- ممدوح : بصي يا حبيبتي الشرع محلل للراجل أربعة و.....
- إلهام: شرع أيه دلوقتي ودار أفتاء مين أنا بسأل سؤال محدد هو أنت ممكن تفكر تتجوز عليا
- ممدوح: أنتي بتبرقي كده ليه
- إلهام: مفيش أنا خارجة ورايحة لها ورجعالك تاني خلي بالك من نفسك يا بيبي
- وبعد شوية
- إلهام : أنااا جيت يا بيبي
- ممدوح : نورتي يا روعي
- خير احكي لي جوز سهام أتجوز عليها ليه (والله راجل وعمل الي كل الرجالة نفسها تعمله)
- إلهام: الناقص أبو عين زايغة أتجوز البت الممرضة الي شغالة معاه شفت يا دوحة السفالة

-ممدوح : هو يعني لو دكتورة تمشي

-إلهام : أنت بتدافع عنه ولا أياه

لأ خد بالك ده أنا مخلفة لك عيال روحهم في أمهم ولا يكسروش لها كلمة

-ممدوح : وأحنا مالنا يا حبيبتى وبعدين الواد خالد أي نعم هو شبه أمه

ودي ممكن أعتبرها إعاقة شكلية لا تؤثر في مضمون الواد.. بكره أخليه

شبهى ماهو مش معقول أنا اللي أصرف وأطفح وفي الآخريكبر يقول ست

الحبايب يا حبيبة ده أنا أطرده بره البيت هو وأمه هههههه

-إلهام : نعم يا سي دوحة تطرد مين

-ممدوح : بهزر يا إلهام معاكي بطلعك من جو الجواز ده وينسيك مشاكل

سهام

-إلهام: حبيبي يا دوحة وقلبي أنت أنا هغير هدومي وأعملك كوبيتين

عصير وأجبلك حتتين جاتوه وأدلحك يا عيوني

-ممدوح: على العكس من ظن البعض الوضع المستقر ده مخليني قلقان

نحمد ربنا ليل ونهاراه.. بس الطبيعي في الدنيا هو إن الإنسان يتبهدل.. لما

بلاقي الدنيا ماشية كويس بقلق ويقول استر يارب.. لأن الضربة لو حصلت

وقت الرخاء بتبقى قاسية أوي

يا عيني عليك يا دوحة لما تبهدلك إلهام

و.....

أستنوني بكرة

الحلقة الستون

مفيش خناقات ولا حبشكنات

في على عش الحب و نشوف

-إلهام : صباح الفل يا عيون إلهام طب والنبي لأعملك أحلى سندوتش

أومليت وطبق سلطة إنما أيه وكوبيتين شاي وصاية

-ممدوح : فحمتيني يا حبيبتى بدلحك ده

طب متنسش تحطى معاه شوية تحابيش كده وتعالى بسرعه علشان

بتوحشيني

-إلهام: تحابيش وبتوحشيني

(وماله أهو كله حب)

-ممدوح : ولبستها العمة من سكات و

-إلهام : شفت يا حبيبي وأنا بحضر الأكل بفكر في نعم ربنا عز وجل الكثير

أوي علينا

-ممدوح: آه يا حبيبتى بينما أنا في الواقع (قلقان فزعان خوفان) من جو

الرومانسية ده

-إلهام: شفت ربنا مديك زوجة ولا أروع ومستوى اجتماعي كويس

وشغل ممتاز وعيال زي الفل و.....

-مدوح: حلو أووي ساندوتش الأومليت ده ولا التحايش تجنن
 -إلهام: تحايش ايه وأومليت ايه يا راجل
 بقى أنا ضاربة لك رومانسية من الصبح وعمالة أقولك على نعم ربنا عليك
 والبعيد أيه مش عارف يقولي كلمة شكرانية واحدة
 -مدوح: آه باني بقى أنتي عاملة الجوده مش لله والوطن
 عاوزاني أشكر فيك وخلص يا هانم
 -إلهام: وماله يعني لما تقولي كلمتين شكر وحب كده لله في الله
 هو مش أنا مراتك حبيبتك أم ولادك
 -مدوح: وهو أنا أنكرت أم ولادي ولا مراتي
 -إلهام: وحبيبتك كمل الجملة
 -مدوح: بطلي دلح بقى وأعقلي شوية يا مجنونة
 -إلهام: أنا مجنونة يا مدوح إهئ إهئ يا ميله بختك يا إلهام
 مدووح
 -مدوح: عارف طلقني

يووووة أستنوني بكرة

الحلقة الواحدة و الستون

ممدوح طهق من إلهام وعماييلها والحظر وسنينه وقعدته في البيت ليل نهار

و...

-إلهام : دوحة يا حبيبي أصحي بقينا الظهر

-ممدوح : أيوة يابنتي فيه ايه ؟

أنتي بتصحيني ليه دلوقت أنا نايم متأخر من عمايلك السوداء

-إلهام : هو يعني أنا اللي نايمة من المغرب ما أنا نايمة معاك بعد خناقاتك

ونكدك يا روح الروح

بقولك أنا رايحة لخالتو أعزي مرات أبنها مصطفى ماتت من يومين ولغاية

دلوقت مروحتش أعزيهم

-ممدوح: طيب يا روحي وخدي الباب في إيدك وأنتي نازلة

-إلهام: هو ايه اللي طيب ده أقوم يلا

-ممدوح: أقوم ليه عاوزة اعمل ايه بس على الصبح يا إلهام

-إلهام: تيجي معانا توصلنا وتعزي خالتو ومحمد كمان أنت عاوزنا نتبهدل

في المواصلات و نتصاب بالمرض وكورونا

-ممدوح : (يارب يا أختي مش بعيد عن ربنا) لا يا حبيبتني بعد الشر

عنكم كلكم بس أنا هعزي خالتك ليه وقعدة ستات وكده

سيبيني أروح لأبن خالتك مصطفى لوحدي أحسن
 -إلهام: هما فين الستات يا حبيبي مفيش عزا أصلاً ما أنت عارف
 التجمعات ممنوعة
 -مدوح: ولما هو مفيش عزا اصلاً مصحيانى على الصبح ليه وأرفاني معاكي
 -إلهام: يا حبيبي علشان ابن خالتي يعني لازم نروح
 وبعد ما حضرت الفطار و.....
 -إلهام: مدوح أنت نمت تاني ولا أيه
 -مدوح: هو أنا بعرف أناام ولا أتنبيل في البيت ده منك ومن عمايلك
 يا شيخة أتقي الله فيا وشوفيلك شغلانة غيري
 -إلهام: الله مطولك يا روح (صدق الي قال لولك عند الكلب حاجة قوله
 يا سيدي)
 معلش يا حبيبي كلها عشر دقايق بس نسلم على خالتو وابنها ونقولها شدي
 حيلك وخلص
 -مدوح: أنتي قلتي ايه يا هانم بصوت واطي في سرك .. سمعيني كده
 -إلهام: مقلتش ده أنا بقول
 من غير سلامات يا حبيبي عشان الأمراض وكورونا ونمشي علطول
 -مدوح: طيب ماشي من غير سلامات ونمشي علطول
 أمرك لله يا دوحة، قومي جيبي البنطلون الأسود الي شبه إياي الي
 عايشها معاكي

-إلهام: طيب يا دوحة الله يسامحك وطي صوتك شوية علشان مش كل
شوية العيال والحيران يسمعو صوتنا ... دوحة، مش لاقية البنطلون الأسود
بينه في الغسيل ياروحي

-ممدوح: طيب مش هتخايق فين البنطلون الكحلي

-إلهام: ايه على صوتك شوية مش سامعه

-ممدوح: يووووووه ... فين الزيت البنطلون علشان نخرج

-إلهام: ماقلنا وطي صوتك البنطلون الكحلي آه في دولاب الواد خالد

-ممدوح: بينيل ايه في دولاب المحروس ابنك

-إلهام: لبسه مرة، ايه جريمة يعني

-ممدوح: ويلبسه ليه يا هانم، طبعاً جريمة وتسبب منك وإهمال

أنتي عارفة إني مبحبش حد يلبس لبسي

-إلهام: وأنا أيش عرفني أنك بتقرف من إبنك هو أنا هحرسلك هدموك

-ممدوح: اوعي من وشي كان يوم أسود يوم ما تجوزت

حسي الله ونعم الوكيل فيكي يا بعيدة أشوف فيكي يوم والله ما أنا قاعدك

فيها ولا رايح معاكي

-إلهام: إهه إهه يا ميلة بختك يا إلهام توب عليا يارب من الحظر وسنينه

ياعيني عليا من عمايل جوزي فيا و

يوووووة أستنوني بكرة

الحلقة الثانية و الستون

بعد مشاحنات وهبشتكنات و حبة خناقات و يوم جديد بدأ ونشوف و

-رهف : ماما يا ماما

-إلهام: ايه على الصبح عاوزة ايه

وطي صوتك لأبوكي يصحى وينكد علينا

-رهف: عارفة يا ماما جارتنا تانت سوسو الي فوق في الدور السابع

-إلهام: أه مالها مش دب الي ضاربة شعرها أوكسحين وهو شبه المقشدة كده

بالظبط

-رهف: ايوة هي دي

لاقيت بابا أمبارح واقف معاها ساعة وبعدين قالتله هتعبك معايا يا

أستاذ ممدوح ومستنيك بكرة الساعة 6

-إلهام : مستنياه ده أنا هخلي اليوم مطلعتش له شمس

وأنتي يا جزمة قديمة يالي معرفتش أربيكي إزاي تتجسي- على أبوكي يا

كلبة

يلا غوري على أوضتك بلا هم

رهف : إهـ إهـ هو ده جزاتي أني بنورك المحكمة

تستاهلي الي بيعمله فيكي بابا

- إلهام : يلا يا كلبة على أوضتك
وبعد شوية وقت و
-إلهام : شفت جارتنا سوسو عملت إيه
-ممدوح : مين سوسو دي
-إلهام : سوسو اللي ساكنة معانا في العمارة
-ممدوح : آه أم رامي اللي ساكنة في الدور السابع
-إلهام : أيووو دي اللي شعرها شبه المقشدة وضاربة أكسجين فيه
-ممدوح : آه عارفها شعرها أصفر وحلوه شويه كده
-إلهام :بتقووول ايه
-ممدوح : إيه مالها غير أنها حلوه وشعرها أصفر
-إلهام : عال يا ممدوح بتقول حلوه في وشي وكمان خدت بالك من شعرها
وعامل نفسك متعرفش حد في العمارة
-ممدوح : لا أبداً دا أنا شفتها مرة واحدة بس
-إلهام : كل ده من مرة واحدة أمال لومرتين كنت عملت ايه
-ممدوح : بقولك ايه يا إلهام أنا مش ناقص جنان على الصبح عاوزة مني إيه
الساعة دي
-إلهام : كنت واقف معاها ليه ساعة بحالها وإدتك ميعاد النهاردة الساعة 6
تروحها

-مدوح: نهارك أسود يا إلهام بتتنظي عليا من ورايا
-إلهام: جوزي وبحافظ عليك مش عيب الواحدة تاخذ بالها من جوزها
-مدوح: إخرسي يا هانم

بقي بتتنظي عليا بعد كل السنين دي وتقولي بتحافظي عليا
طيب تعاليلي بقي والله ما سييك من إيدي
-إلهام: أي أي يا دوحة سيب شعري

ده مش مقشة زيها
أي يا عيني أي أي بالراحة يا دوحة
أي أي حرمت خلاص
يا لهوووووي يا عيال
أالحقوني

يوووة استنوني بكرة

الحلقة الثالثة و الستون

- مدوح قالها كان ليه واقف مع جارتهم سوسو أم شعر أصفر
والهام يا حرام كالعادة رقبتهأ أد السمسة و تعالوا نشوف
-مدوح : إلهام يا إلهام
-إلهام : ايوه يا حبيبي صباح الخير يا روجي خير بتنادي عليآ تأمرني يا قلبي
-مدوح :ايه ده بسم الله الرحمن الرحيم
-إلهام :مالك يا حبي أنت بتبصلي ومستغرب كده ليه
-مدوح : أصل من يوم ما اتحظرنا أول مرة أنادي عليكي وتردي علي طول
من غير ما تنكدي علينا
-إلهام : أنت كنت عاوز حاجة
-مدوح : آه جهزيلي الفطار وكوبية الشاي والقميص الكروهات الأحمر في
الأزرق
-إلهام : أهو يا روجي مغسول وجاهز ومكوي اتفضل
-مدوح : والبنطلون الجينز الكحلي والكوتشي الأسود
-إلهام : أهه كنت بمسحه والبنطلون أهو أتفضل يا عيوني
-مدوح :مالك يا حبيبتني أنتي عيانة؟
-إلهام : لا يا قلبي أنا كويسة بتقول كده ليه

-ممدوح : مفيش بس مستغرب يعني عموماً عاوزة طلبات من السوق أو السوبر ماركت

-إلهام : الي تجيبه يا حبيبي هاته والحمد لله على كل حال

-ممدوح :أنتي فيكي حاجة متغيرة النهاردة مالك يا إلهام أنتي حاسة بحاجة بتوجعك

-إلهام : أنا زي الفل تمام والحمد لله

دي أقل حاجة أعملها لجوزي حبيبي هو أحنا لنا غيرك

-ممدوح : أنتي متأكدة انك كويسة صارحيني حاسة بسخونة أو تعب يابنتي لو تعبانه قوليلي ليكون الوباء الي بيقولوا عليه جالك

-إلهام : ربنا يبعد عنك المرض يا حبيبي

-ممدوح : اللهم آمين طيب بقى أنا خارج

-إلهام : ربنا يكتبلك في كل خطوة سلامة و يكفيك شر العين مع ألف مليون سلامة يا روجي

-ممدوح : لأ بقى أنتي النهاردة مش طبيعية وأنا مش خارج غير لما أعرف فيه ايه

(على العكس من ظن البعض الوضع المستقرده مخليني قلقان نحمد ربنا ليل ونهار آه .. بس الطبيعي في الدنيا هو إن الإنسان يتبهدل.. لما بلاقي الدنيا ماشيه كويس بقلق ويقول أستريارب.. لأن الضربة لو حصلت وقت الرخاء بتبقي قاسيه أوي)

-إلهام : بتقول حاجة يا روجي

-ممدوح : لا مبقولش ده أنا بكلم نفسي (والله هتجنيني بعمايك)

وبعد شوية

-ممدوح: حبيبي أنا مضطر

انزل بقى مجدي عمال يرن على الفون بينه وصل تحت البيت

-إلهام: ماشي يا حبيبي واجب برضه ... تزور صاحبك المكسر في البيت

-ممدوح: أنتي بتتكلمي بجد؟! أنا مش مصدق والله إني هخرج كده من غير

خناق ولا زعيق ولا طلبات

-إلهام: معهلش يا دوحة سماح بقى على الي فات

انزل يا حبيبي وخذ راحتك بس أوعي تقلع الكمامة والكحول في إيدك

علطول وممنوع السلامة يا روجي ... أحنا ملناش غيرك

وبعد شوية

-إلهام : ألوو أيووه يا ماما عملت بنصيحتك أهو وكنت كيوت على الآخر

أهو ... يا ساتر خليه ينزل بقى ويريجنا شوية من قعدته في البيت و

-ممدوح : أيووه يا هانم باني على حقيقتك وأن الحب ده كله علشان زهقتي

من قعدتي بسبب الحظر ... الحمد لله أني نسيت محفظتي ورجعت أخذها

وسمعتك

-إلهام : يا لهوووووي بتتنط عليا يا دوحة ... ممدوووووح طلقني

يووووة أستنوني بكرة

الحلقة الرابعة و الستون

أصطبحننا وأصطبح الملك لله

وممدوح وإلهام مبيخلصوش حكايات و

-ممدوح : صباح الخير

قايمة بتزعقي ليه يا وليه على الصبح

-إلهام : محدش من العيال راضي يصحى علشان أروق الشقة وأروق أوضهم

الي زي مزبلة التاريخ دي

حتى الفطار مفطرتش يا دوحة

قوم أعمل لنا كام ساندوتش أفطر بيهم يسندوني في الشقا الي جاي ده

-ممدوح: طيب وطى الصوت شوية هو أنا في قاره تانية وبعدين سندوتش

ايه تاني ما أنتي كلتي كيك وكوكيز مع الشاي

-إلهام: تعبانة وشقاينة يا راجل أنت هتعد عليا اللقمة

-ممدوح: وهو كل ده اسمه لقمه دول 7 لقم أعد ايه ولا ايه بس يارب شقاء

عمري راح في الكورونا والحظر حرام عليكي

-إلهام : ده بدل ما تقولي صحتين يا راجل

-ممدوح: وهو صحتين بس هينفعوا

إلا قوليلي يا إلهام

لما بتقفي في المطبخ عملي لنا الأكل بتبقى سعيدة؟
إلهام: والله على حسب لو فيها خاتم ذهب مثلاً أكيد هبقى سعيدة
ممدوح: اتلمي يا إلهام وأتكلمي جد من غير الألش بتاعك
إلهام: لو هنتكلم جد من غير ألش آه طبعاً ببقى مبسوفة جداً لأنني
بسعدكم يا حبيبي وبعدين المطبخ ده مملكتي الحقيقة وهي ملعبي بقى يا
دوحة

-ممدوح: ملعبك أه الي حرمانى أدخل وأشوط فيه وأجيب أجوان
-إلهام: أنا يا حبيبي حرماك منه علشان بصراحة كده الأكل بيعع علينا
بالخسارة وفي الآخر محدش بياكله
ها بقى

-ممدوح: خلاص يبقى ربنا عاوز كده متعكرش ليا دمي كل شوية وتقرفيني
وأنا محظور عاوز اشتغل وأسلي نفسي مش معقول كده جتني هترنخ من
الركنة

-إلهام: ما هو يا دوحة أنت بتفتكس لنا حاجات غريبة وإيشي كحك ناعم
ملون ولا سلطة الخضار الي عملتها بالمستردة وطلعت يع خالص
-ممدوح: يووووة كفاية عكننتي عليا اليوم يا شيخة وبعدين يعني يا إلهام
في مثل بيقول

إربط الحمار مطرح ما يعوز صاحبه
يعنى إفهى شوية وسيبيني افتكس براحتي

-إلهام : طب ولو صاحبه حمار وعاوزني اربطه في عربية نازله في الترعة
-ممدوح : أنتي بتقولي على جوزك حمار طيب والله منا سيبك يا إلهام
وهخلي يومك أسود من شعرك
قال حمار قال ده الي ناقص
يقطع الحظر وسنينه
تعالى لي بقى
-إلهام: أي أي يا لهووووي
اه يا عيني سبني يا دوحة يتقطع لساني والني ما أقصد
ألحقووووني يا عيال يا لهوووي
يوووة أنا تعبت من عمالهم
وبفكر أنهي حكايتهم ونرتاح منهم
أستنوني بكرة

الحلقة الخامسة و الستون

(الأخريرة)

بعد خناقات واشتباكات و حبة حبشكنات الدنيا هديت
-خالد: بابا يا بابا قوم أصحى الحظر أتفك والقهاوي أتفتحت
-ممدوح: صح يا ولا ... الكلام ده يا وش الخير
-رهف: أفتح التلفزيون بسرعة يا بابا وشوف رئيس الوزراء
-إلهام: دوحة يا دوحة فرجت يا حبيبي فتحوا القهاوي والنوادي والسينما
إفراج يا دوحة إفراج
-ممدوح: أستنوا كده أما أسمع رئيس الوزراء
-خالد: يا خسارة يا بابا مش هتفتح البلاي أستشن ولا البسين والملاعب
- ممدوح: أهون نص العمى ولا العمى كله
-إلهام: بيقولك أهم حاجة و عي المواطن يا دوحة شكل الحكومة زهقت مننا
وهتضحى بالأم والجنين مع بعض هههههه
-ممدوح: تضحى ايه وزفت ايه ألي بتقوليه ده
يا بنتي الناس تعبت من الحظر ولازم الحياة ترجع تاني بس مجذر
-رهف: صح يا بابا ناخذ حذرنا لو نزلنا و نلبس الكمامة ونراعي التباعد
متر ونص زي ما قالوا

-إلهام : شاطرة بنتي القمر واعية لأمها
-ممدوح: أخيراً هروح القهوة وأقابل صحابي أحمدك يارب
إلهام: لوووولي أخيراً هتنزل يا حبيبي كل يوم وأرجع أرن عليك وأقولك
وحشتني يا دوحة أطلع بقي
-خالد : أنا أتصلت وحجرت يا بوس الكافية علشان نكون من ضمن ال
25٪ اللي هننزل الكافية ... أكيد يا بوس الإقبال تاريخي النهاردة
-ممدوح: أبنائي الأعرزاء وأسرتي الجميلة بمناسبة أنتهاء الحظر وليست
أنتهاء كورونا وعودة الحياة لنص مجاريها هقولكم بقي حكمتي الافتكاسية
للحياة والي أتعلمتها من الحظر (قطع وسنينه)
هي الدنيا كده السعادة دائماً في الرحلة مش في هدف الوصول السعادة في
انتظار الإجازة مش في الإجازة نفسها السعادة في الصيد مش في الشوي ولا
القلي ولا السنجاري.. السعادة بنكتشفها بعد ما العمر يعدي والأيام
تتسررب من بين صوابنا بعد موضوع الحظر أنا اكتشفت إن اللي عدى
فعلاً كانت أجمل أيام عمري كنت مستمتع جداً بارتكاب الأخطاء عن
جهل.. كل يوم بتعلم درس جديد واكتشف إنني كنت حمار في اليوم اللي
قبله.. متعة استكشاف الحياة لا تضاهيها أي متعة في الدنيا.. مع الوقت لما
الإنسان بيكبر بيحس بالملل.. بيتضخم جواه شعور عام بالزهق من كل شيء

وأى شيء لأن مفيش جديد ولا تجديد.. معادش في حاجة قادرة إنها
تدهشني و ...

-إلهام: بقيت فيلسوف يا أبو خالد

-ممدوح: الأ ليت الشباب يعود يوماً فأخبره بما فعل المشيب

-إلهام: طيب حضرتك بدل ما أنت عاوز تخبر الشباب بما فعل المشيب الي
هو أساساً لسه مجاش .. أخبرنا أحنا هنحتفل ازاي النهاردة بفتح الحظر
والكافيات والنوادي

-ممدوح: أنتهت الحدوتة على كده

وبعترف أن شيلت مراتي همومي هي معندهاش أي شيء تقدمه إلا كلمة
حلوة أو دعوة كويسة.. هي ست عادية جداً زيتها زي كل الستات.. لا تملك
من مقومات الدعم إلا طبخة دسمة كويسة أو صينية بقلادة تخفف بيها
النكد الي كلنا كنا سبب فيه من الحظر والكورونا ولكني اكتشفت إن
البساطة دي هي سبب قوتي أنا هو ده بالظبط الي ربنا قال عليه سكن أد
ايه كنت عاصف غضبان لما بدأ الحظر وسنينه وأد ايه دلوقتي أنا ساكن
تماماً و.....

رايحة الكوافير ... رايح القهوة

بتحبي ... أيوه يا بسبوسة

وتوتة توتة خلصت الحدوتة

أنتظروني في حكايات جديدة....

افتكاسات زوج محظور

حلفات كوميديا

إيمان العادلي



الطبعة الأولى

1442 هـ - 2020 م

دار ديوان العرب للنشر والتوزيع

مصر - بورسعيد

جوال: 0020121132879

E-mail: mohamedhamdy217217@gmail.com